

ଏବଂ ଆମକୁ ଲିଖିତ ପତ୍ର ଏବଂ ଲୋକାଙ୍ଗ ରାସ୍ତାମାନି ଆକୁ ଏବଂ ଆକୁ ବିସୟତାନ୍ ଏସ ମାତା

ଏବଂ ଆକୁ ଶ୍ରେଣିକା ସିନି ଉନ୍ନତି ଆକୁ । ପାଠିକ ନିୟମ ଆଇଆଇ ବାବବାଣି ଶ୍ରେଣି ପୁରା ଆତିମାନି ବିସୟ ଇବେନ୍ ମାନାତ୍ । ଇକା ଉନ୍ନତି ଉପଦେସ୍ ଖାଜା । ଇବେନ୍ ପୁରା ୬୦ ଦାନ୍ ନାଶ୍ ପାଠିକ ନିୟମତି ବିସୟକୁ ତେବାତେମାନେ । ଆମାକା ଜିସୁ କ୍ରିସ୍ଟ ଏଣ୍ଡେସ୍ ଖାଜା ବାବବାଣି ମାରି ଜିହୁଦି ଜାଜକରି ପାଣି ପୁରା କିତାନ୍ ଇବେନ୍ ମାପ୍ ପୋଇତାମାନାପ୍ ।

ଇୟା କାରଣତାନ୍ ଇକା ଜିହୁଦି କ୍ରିସ୍ଟାନ୍ ଲୋକାଙ୍ଗ ସାହାସ୍ ସିନି ବଇ । ଏବଂ ଆକୁଦୁ ତରନାତ୍ ଜେ, ଜିସୁ ଏଣ୍ଡେସ୍ ନିୟମ୍ ଶ୍ରେଣିତାନ୍, ଏମେ ବାଦଲୁ ଜାଜକ ମାରିତେସି ଏସକାଙ୍ଗ ବଲି ପୁଜାସିଏନ୍ ମାରାନ୍ । ଜିସୁ କ୍ରିସ୍ଟ ଆଜିନାନ୍ ଶ୍ରେଣି ପାପତି ପୁଜାସିନିକାନ୍, ଇକା ଉନ୍ନତେ ଦେବାନେ ଶ୍ରେଣିଖାଲେ ଉଣ୍ଡିଙ୍ଗ୍ । ଇଲେଇତି ଦୁନିଆଦି କ୍ରିସ୍ଟାନ୍ ଲୋକା ଉଣ୍ଡିଙ୍ଗ୍ ଏବଂ ବଇଦୁ ସାହାସ୍ତିକା ତରନାତ୍ । କେବଲ୍ କ୍ରିସ୍ଟ ମାଙ୍ଗ୍ ମାପୁରୁଙ୍ଗ୍ ଆସା କିନି ଉଣ୍ଡିଙ୍ଗ୍ ପୁରା କିଦେଙ୍ଗ୍ ଆଟ୍ନାନ୍ । ମାରି ବା ଖାନିମାନୁ ଆସା କିଜି ଶ୍ରେଣିକା ବୁଲାନାଟ୍ ୧୨:୨ ।

ଏବଂ ଆକୁ ଏନ୍ ରାସ୍ତାମାନାନ୍ ନେସ୍ଏର୍, ମାତର୍ ପଣ୍ଡିତକୁ ସିନ୍ତା କିନାଟ୍, ପ୍ରେରିତ ପାଉଲ, ଲୁକ, ମାରି ବର୍ଣ୍ଣବା ଆନାମାନାଟ୍ । ଇୟାତାନି ରାସାତି ବେଡା ବା ନେସ୍ଏର୍ ମାତର୍ ନାଶ୍ ଲୋକୁ ବିସ୍ବାସ୍ କିଜିନାଟ୍ ଇକା ଜିସୁ କ୍ରିସ୍ଟି ଜନମ୍ ଶ୍ରେଣିକା ୭୦ ବାର୍ଷୁଦୁ ରାସାତାମାନାଟ୍ । ଜିରୁସାଲାମ୍ ମନ୍ଦିର୍ ୭୦ ବାର୍ଷେକ୍ତୁ ନାସ୍ ଆତାତ୍, ମାତର୍ ଇୟା ଆକୁଦି ରାସ୍ତିକାନ୍ ଇକା ନାସ୍ ଆଇ ମାନି ଖାଜା ଇନାନ୍ । ଏବଂ ବଇ ଆନାତ୍ ଜେ ରମାୟ ଗାଡ୍ତୁ ରାସାତାମାରାତ୍ ୧୩:୨୪ ମାରି ଆଇଆଇ ମଣ୍ଡଲିଦୁ ସିଆୟ ଆତାମାରାତ୍ ।

ଇୟା ଆକୁଦି ଏସ ମୁକ୍ୟ ବିସୟ

୧. ରାସ୍ତିକାନ୍ ତରନା ସିନାନ୍ ଜେ, ଜିସୁ କ୍ରିସ୍ଥ ଆଜିନାନ୍ ମାପୁରୁଦି
ବାବବାଦି ମାରି ଦୁଡ଼କା ମାଣାନ୍ ବା ପେରିକାନ୍ । ୧:୧-୪:୧୩
୨. ରାସ୍ତିକାନ୍ ତରନା ସିନାନ୍ ଜିରୁସାଲମ୍‌ତୁ ସେବା କିଜିମାନି
ଜାଜକରି ମାଣୁକୁ ବା ଜିସୁ ପେରିକାନ୍ । ୪:୧୪-୭:୨୮
୩. ମସାଦି ମାଣାନ୍ ଲୋକାଙ୍ଗ୍ ସିଆୟୁଆତିମାନି ନିୟମତି ପାଡ଼ୁଲ
ନିୟମତି ମାଣାନ୍ ଜିସୁଦି ସେବା ପାଣି ପେରିକା । ୮:୧-୧୦:୩୧
୪. ରାସ୍ତିକାନ୍ ଜିସୁଙ୍ଗ୍ ଝିଜୁମାନୁ ପେରିକାନ୍ ଇକା ବୁଜାକିଜି ଗାଦି
ମାଟେଙ୍ଗ୍ ସିନାନ୍ । ୧୦:୩୨-୧୩:୧୭
୫. ରାସ୍ତିକାନ୍ ଇୟା ବଇଦୁ ସାହାସ୍ତି ମାଟେଙ୍ଗ୍ ନି ସାରାସାରି
ମାଟା ସିଜି ସିସ୍ତାନ୍ । ୧୩:୧୮-୨୫

ମାରିସିଦି ମାଣାନ୍ ମାପୁରୁସିଦି କାବୁର୍

^୧ ପୁର୍ବେଦାନ୍ ମାପୁରୁ ଆଇ ବେଡ଼ାଦୁ ମାରି ଆଇ ଆଇ ଉପାୟତାନ୍
ବାବବାଦିରି ମାଡ଼ାନ୍ ମା ଡକ୍ରାଦାଦାରିଙ୍ଗ୍ କାବୁର୍ ସିତାମାର୍ହାନ୍,

^୨ ମାତର ଇୟା ଝିଜିନ୍ ଦୁନିଆଦୁ ଝାନ୍ ନିଜେଦି ମାରିନ୍ତି ମାଡ଼ାନ୍
ମା ଝାଲେ ଝାରିଗିତାମାନାନ୍ । ଆୟା ମାରିନ୍ତି ମାଡ଼ାନ୍ ନେ
ମାପୁରୁ ସାରାଦୁନିଆଦିଙ୍ଗ୍ ତିଆରକିତାନ୍ ମାରି ସାରାସାରିଝେନ୍‌କା
ଝିଜୁ ବିସୟତି ଅଦିକାରି ଆନି ଉଣ୍ଡିଙ୍ଗ୍ ଝାନ୍ ଝାନିଙ୍ଗ୍ ବାସେକିତାନ୍ ।

^୩ ଝାନିମାନୁ ମାପୁରୁଦି ମହିମା ଜାୟ କିବିସକିତାମାନାନ୍ ମାରି ପୁରା
ମାପୁରୁଦି ନିଜେଦି ରୁପ୍‌ଝାଜା । ମାରି ଝାନ୍ ନିଜେଦି ସାଲ୍ଲି ବାକ୍ୟ
ଦାନ୍ ଝିଜୁଦେସ୍ତିଙ୍ଗ୍ ସାଲା କିତାମାନାନ୍ । ଝାନ୍ ଲୋକା ଜାତି ଉଣ୍ଡିଙ୍ଗ୍
ପାପ କେମା କିଜି ମୁସ୍‌କୁପୁର୍ ମହାମହିମା ମାପୁରୁଦି ଉଣିକିୟୁ ତରିନ୍
ବାସ୍ତାମାନାନ୍ ।

ମାପୁରୁଦି ମାରିନ୍ ପେରିକାନ୍

^୪ ଝାନ୍ ମୁସ୍‌କୁପୁରତି ଦୁଡ଼କା ବାଦ୍‌ଲୁ ଏଣ୍ଡେସ୍ ପେରିକାନ୍, ଝାନି
ଦରୁ ବା ଆୟାଝାଜା ତାମେକା ଦରୁ ବାଦ୍‌ଲୁ ନାଣ୍ଡ ପେରିକା ।

^୫ ଇରିଙ୍ଗ୍ ଏସାଙ୍ଗ୍‌ବା ମାପୁରୁ ଏମେ ଦୁଡ଼କାଙ୍ଗ୍ ଇନ୍‌ଏନ୍ :

“ନିନ୍ନୁ ନା ମାରିନ୍,

ନେରରାନ୍ ନାନୁ ମି ବୁବା ଆତାମାନା ।”

ମାପୁରୁ ବା ଇର୍ହାନ୍,

“ନାନୁ ଖାନି ବୁବା,

ମାରି ଖାନ ନା ମାରିନ୍ ।”

୭ ମାତର୍ ମାପୁରୁ ଖାନି ଆଗଡ଼ିରି ମାରିନ୍ତିଙ୍କ ଇୟା ଜଗଡ଼ୁ ପୋକ୍ତି
ଖାଲେ ଇକା ଇର୍ହାମାର୍ହାନ୍ :

“ମାପୁରୁଦି ଦୁଡ଼କୁ ଝିଜୁ ଖାନି ପୁଜା କିନେ ।”

୮ ମାତର୍ ମୁସକୁପୁରତି ଦୁଡ଼କା ବିସୟତାନ୍ ମାପୁରୁ ଇୟା ମାଟା
ଇର୍ହାମାନାନ୍;

“ମାପୁରୁ ନିଜେଦି ଦୁଡ଼କାଙ୍କ ଗାଲି ଖାଜା

ମାରି ନିଜେଦି ସେବାକିନିଝାରିଙ୍କ ସିସୁଡ଼ିବୁ ଖାଜା କିନାନ୍ ।”

୯ ଖାନି ମାରିନ୍ତି ବିସୟତାନ୍ ଖାନ ଇର୍ହାମାର୍ହାନ୍ :

“ଏ ମାପୁରୁ, ନି ରାଜି ଝିଜୁଦିନ୍ ମାନିଡ଼ !

ନିନ୍ ନ୍ୟାୟୟଶ୍ଚତାନ୍ ନି ଲୋକାଙ୍କ ସାସନ୍ କିଜିନି ।

୧୦ ନିନ୍ ନେଗିତାନିଙ୍କ ଜିବନ୍ନୋନି ମାରି ତାରାଇ ତାନିଙ୍କ କାଡ଼ିନି ।

ଆୟାଉଣ୍ଡିଙ୍କ ମି ମାପୁରୁ ନିଙ୍କ ବାସେ କିତାମାନାନ୍

ମାରି ନି ସାଙ୍ଗର୍ ବାଦ୍ଲୁ ନିଙ୍କ ଅଦିକ୍ନାଶ୍ଚ ମାନାଜି ଝେଡ଼ିକାଦି

ନିୟୁଦାନ୍ ଉସୁତାମାନାନ୍ ।”

୧୧ ଖାନ ମାରି ବା ଇର୍ହାମାନାନ୍ :

“ଏ ପ୍ରବୁ, ନିନ୍ ଆଗଡ଼ିନେ ଦୁନିଆ ତିଆର୍ କିତି,

ମାରି ନିଜେଦି କିୟୁଦାନ୍ ବାଦଡ଼ ତିଆର୍ କିତି ।

୧୨ ଆୟାଝିଜୁ ଅରଲେନ୍ ମାରାଗ୍ନାଡ଼ । ମାତର୍ ନିନ୍ ଝିଜୁଦିନ୍ ମାନି;

ଝାର ପାଡ଼ିଇ ଆଙ୍କ ଖାଜା ନାସୁ ଆନାର୍ ।

୧୩ ଆଙ୍କ ପାସିୟା ରସ୍ତି ଖାଜା ନିନ୍ ଆୟାଝିଜୁ ରସ୍ତି ଇଡ଼ିନି

ମାରି ଆଙ୍କ ବାଦେଲେକିନି ଖାଜା ବାଦ୍ଲେ କିନି ।

ମାତର୍ ନିଜେ ନିନ୍ ବାଦ୍ଲେଆଇ

ମାରି ନିନ୍ ଝିଜୁଦିନ୍ ତେବାନି ।”

୧୪ ମାପୁରୁ ଖାନି ଏମେ ଦୁଡ଼କାଙ୍କ ଏସାଙ୍କ ଇନ୍ଏନ୍,

“ନାନୁ ନି ସାଡ଼ୁରିଙ୍କ ନି କାଲକା ଆଡ଼ଗି କିଏତି ସାନ୍ତି

ନିନ୍ ନା ଉଣେରି କିୟୁ ତରିନ୍

ବାସ୍‌ସୋମାନାଆ ।”

୧୪ ଆରତିଙ୍କ ମୁସକୁପୁରତି ଦୁହକୁ ଏର ? ଖାର ଆଜିନାର ମାପୁରୁଦି ସେବାକିନିକାର, ରକିୟା ପୋଇତିମାନି ଲୋକୁଦି ସାକା ଉଣିଙ୍କ ମାପୁରୁଦି ମାଡାନ ପକାତି ଆଡମେଙ୍କ ।

୨

ପେରି ରକିୟା

୧ ମାପ୍ ଏଣ୍ଡେସ୍ ସଡ଼ତାନ ଝେରଏ ଆଏପ୍, ଇୟାଉଣିଙ୍କ ମାଡ଼ ଝେରଇମାନି ସଡ଼ ମାଟାଦୁ ଆଟୁଝାଆଜି ତେବାନିକା ମାନାଡ଼ ।

୨ ଇରିଙ୍କ ଆଗଡ଼ି ମାପୁରୁ ମୁସକୁପୁରତି ଦୁହକାଙ୍କ ଏମେ କାବୁର୍ ସିତାମାନା, ଆକା ସଡ଼ ଇଜି ପାରମାଣ୍ ଆତାମାନାଡ଼, ଆମାକାର ତାନିଙ୍କ ଡ଼ିସ୍‌ସି ମାନାଏତାର, ଖାର ସାମାନ୍ ଦଣ୍ଡ ପୋଇତାମାନାଡ଼ ।

୩ ଆରତିଙ୍କ, ଇୟା ପେରିରକିୟାଦିଙ୍କ ଡ଼ିସ୍‌ତିଙ୍କ, ମାଡ଼ ଏଣ୍ଡେସ୍ ରକିୟା ପୋଇନିକା ? ଇୟା ପରିତ୍ରାଣ ନିଜେ ପ୍ରବୁ ନିଜେ ଆଗଡ଼ିନେ ଝେରତାମାନାନ୍ ମାରି ଖାନିମାନୁ ଝେରଇମାନି ଲୋକୁ ଖାନି ପେରିସଡ଼ ମା ଲାକୁଡୁ ପାରମାଣ୍ କିତାମାନାଡ଼ ।

୪ ମାରି ବା, ମାପୁରୁ ଆଇ ଆଇ ସିନେଙ୍କ ନି କାବାଆନି ପାଣି ମାରି ଏସାଙ୍କ ଗଟନାଦାନ୍ ଆୟାଞ୍ଜିକୁ କାବୁର୍ ସଡ଼ ଇଜି ସାକି ସିତାମାନାନ୍ ମାରି ନିଜେଦି ବଦାଦାନ୍ ପବିତ୍ରଆମ୍‌ଦି ଦାନ୍ ଝିକୁ ବାଟା କିତାମାନାନ୍ ।

ରକିୟା ସାରିଦୁ ଆଗଡ଼ିଅନି କ୍ରିସ୍ତ

୫ ମାପୁରୁ ଆମା ପୁନି ଦୁନିଆ ତିଆର୍ କିନାନ୍ ମାରି ଆମା ଦୁନିଆଦି କାବୁର୍ ମାପ୍ ଇଜିନାପ୍, ଖାନି ଅଦିପତି ଇସାପ୍‌ତାନ୍ ଖାନ୍ ମୁସକୁପୁରତି ଦୁହକାଙ୍କ ଆସ୍କିଏନ୍ ।

୬ ଦାର୍ମସାସ୍ତ୍ରୁ ମାଟା ରାସାତାମାନାଡ଼ :

“ଏ ମାପୁରୁ, ଲୋକୁ ଏନ୍ ଜେ, ନିନ୍ତୁ ଖାନି ଉଣିଙ୍କ ସିତା କିଜମାନ୍‌ଆ ମାରି ମନୁଷ୍ୟପୁତ୍ର ଏସ ତାଗ୍‌ଇକାନ୍ ଆତିଙ୍କବା ମିରୁ ଖାନି ଜାଡୁନ୍ ଅସିନି ?

୭ ନିନ୍ତୁ ଖାନିଙ୍କ ମୁସକୁପୁରତି ଦୁହକା ମାଡାନକୁ ଅଡ଼ପ୍ ମାଡର୍ ଇସ୍‌କାକିଜି ଇଟିମାନି;

ନିନ୍ନୁ ଖାନିଙ୍ଗ ଗୌରବ୍ ମାରି ସନ୍ମାନରୂପତି ଟପିଦାନ
ଆରିସକ୍ତିମାନି,

୮ ମାରି ଝିନ୍ନୁ ବିଷୟ ମୁସୁକୁ ସାସନ୍ କିଦେଙ୍ଗ୍ ସିତିମାନି ।”

ମାପୁରୁ ଲୋକାଙ୍ଗ୍ “ଝିନ୍ନୁ ବିଷୟ ମୁସୁକୁ ସାସନ୍ କିଦେଙ୍ଗ୍ ସିତିମାନାନ୍
।” ଇବେଟ୍ତାନ୍ ପୁରାନେସ୍ନିକା ଜେ, ଝିନ୍ନୁ ବିଷୟ ଖାନି ଅଦିକାରୁତୁ
ତେବାତେମାନେ, ଏଣ୍ଡେସବା ମାଡ୍ ନେସ୍ନିକା, ଲୋକୁ ଇଲେଇ ଝିନ୍ନୁ
ବିଷୟ ମୁସୁକୁ ଅଦିକାର୍ କିଏର୍ ।

୯ ମାତର୍ ମାପ୍ ସୁଡ଼ୁନିମାପ୍, ଏଣ୍ଡେସ୍ ଜିସୁ ମୁସୁକୁପୁରତି ଦୁଡ଼କା
ମାଣୁକୁ ଅଡ଼ପ୍ ଇସିକା କିଆୟାଆତା ମାର୍ହାନ୍, ଏଣ୍ଡେସକି ମାପୁରୁଦି
ଦୟାଦାନ୍ ଖାନ୍ ଝିଜେରି ଉଣ୍ଡିଙ୍ଗ୍ ସାନାନ୍ । ଖାନି ଆୟା ସାତିଦଣ୍ଡ
ଉଣ୍ଡିଙ୍ଗ୍ ମାଡୁ ଖାନିଙ୍ଗ୍ ଇଲେଇ ଗୌରବ୍ ମାରି ସନ୍ମାନରୂପତି
ଟପିଦାନ ଆରାତିମାନିକା ସୁଡ଼ୁନିକା ।

୧୦ ଝିଜେରିଙ୍ଗ୍ ତିଆରକିତିକାନ୍ ମାରି ରକିୟାକିନିକାନ୍ ମାପୁରୁ ଖାନି
ନାଣ୍ଡ କଡ଼ରିଙ୍ଗ୍ ଜିସୁଦି ଗୌରବ୍ଦୁ ମିସା କିନି ଉଣ୍ଡିଙ୍ଗ୍, ସାତି ମାଡ଼ାନୁକୁ
ଜିସୁଙ୍ଗ୍ ପୁରାନେଗିକା କିଜି ଟିକ୍ ପାଣି କିତାମାନାନ୍ । ଇରିଙ୍ଗ୍
ଜିସୁନେ ପରିତ୍ରାଣଦି ସାରିଦୁ ଖାରିଙ୍ଗ୍ ସାଲାକିଜି ଅନାନ୍ ।

୧୧ ଖାନ୍ ଲୋକାଙ୍ଗ୍ ପାପ୍ତାନ୍ ପବିତ୍ର କିନାନ୍ । ମାରି, ଆମାକାର୍
ଜିସୁ ମାଡ଼ାନ୍ ପବିତ୍ର ଆନାର୍, ଖାର୍ ଝିଜେରେ ଅରେନ୍ ବୁବାଦି କଡ଼ର୍
। ଆୟାଉଣ୍ଡିଙ୍ଗ୍ ଜିସୁ ଖାରିଙ୍ଗ୍ ତଡ଼ାନ୍ ନି ତାଙ୍ଗ୍ ଇଜି ଇନ୍ତେଙ୍ଗ୍
ସେମାର୍ ଆଏନ୍ ।

୧୨ ଖାନ୍ ମାପୁରୁଙ୍ଗ୍ ଇର୍ହାମାନାନ୍ :

“ନାନ୍ନୁ ନି ଝିନ୍ନୁ ପାଣି ନା ତଡ଼ାନ୍ ନି ତାଙ୍ଗ୍ କାଙ୍ଗ୍ ଝେର୍ନା ।

ନାନ୍ନୁ ଖାରି ମଣ୍ଡଲିଦି ନାଣ୍ଡଲୋକୁ ଉଣ୍ଡାତିମାନ୍ନୁ ନି ପ୍ରସଂସା ପାଟା
କିନା ।”

୧୩ ଖାନ୍ ଇକାବା ଝେର୍ତାମାନାନ୍, “ନାନ୍ନୁ ମାପୁରୁଦିମାନ୍ନୁ ବିସ୍ବାସ୍
ତିଆର୍ କିନା” ମାରି ମାପୁରୁ ନାଙ୍ଗ୍ ଏମେ କଡ଼ରିଙ୍ଗ୍ ସିତିମାନାନ୍,
ଖାର୍ ନା ଖାଲେ ମାନାର୍ ।

୧୪ ଖାନ୍ ଏମେଖାରିଙ୍ଗ୍ କଡ଼ର୍ ଇଜି ମାନାତାମାନାନ୍, ଖାର୍
ନେତେର୍କାଣ୍ଡା ମେନ୍ଦଲତି ଲୋକୁ ଆତିମାନିଙ୍ଗ୍ ଜିସୁ ବା ନିଜେ
ଖାରି ଖାଜା ଲୋକା ମୁତ୍ ନି ଗୁଣ୍ ଆସ୍ସି ଖାତାନ୍ । ଖାନ୍ ଇକା

କିନି ମାଟା ଆଜିନାଡ଼, ଖାନ୍ ଏଣ୍ଡେସ୍ ନିଜେଦି ସାନି ମାଡ଼ାନ୍‌କୁ ସୟତାନ୍‌ତିଙ୍ଗ ବିନାସ୍ କିନାନ୍, ଇରିଙ୍ଗ୍ ସାନି ମୁସୁକୁ ସୟତାନ୍‌ତି ଅଦିକାର୍ ମାରଆଡ଼ ।

୧୫ ଇବେଟ୍‌କୁ ଝିଜୁଦିନ୍ ଉଣ୍ଡିଙ୍ଗ୍ ସାନି ତିଲାନି ଦାସ୍‌ତି ଗାଟିଦୁ ମାନି ଲୋକାଙ୍ଗ୍ ଖାନ୍ ମୁକ୍ତା କିତାମାନାନ୍ ।

୧୬ ଇବେଟ୍‌କୁ ଟିକ୍ ନେସ୍‌ରେଙ୍ଗ୍ ଆନାଡ଼ ଜେ, ଖାନ୍ ମୁସୁକୁପୁରତି ଦୁଡ଼କାଙ୍ଗ୍ ସାହାଜ୍ୟ କିଏନ୍, ମାତର୍ “ଖାନ୍ ଅବ୍ରାହାମ୍‌ଦି କୁଟୁମ୍‌ତି ଲୋକାଙ୍ଗ୍ ସାହାଜ୍ୟ କିନାନ୍ ।”

୧୭ ତେନି ଅର୍ଡ ଆଜିନାଡ଼, ଝିଜୁ ବିସୟତାନ୍ ଖାନି ତଡ଼ାନ୍‌କା ଖାଜା ଆନିକା ଖାନି ବଦା ମାର୍ହାଡ଼, ଏମେ ମାଣାନ୍ କି ଖାନ୍ ଖାରି ବିସ୍‌ବାସ୍ ମାରି ଦୟାକିନି ପେରିଜାଜକ ଆଜି ମାପୁରୁଦି ସେବା କିଦେଙ୍ଗ୍ ଆଟ୍‌ନାନ୍ ମାରି ଲୋକୁ ପାପ୍‌କେମା ପୋଇନାର୍ ।

୧୮ ଇରିଙ୍ଗ୍ ଖାନ୍ ନିଜେ ପରିକାଦୁ ଆରଜି କାସୁବଗାତି ମାନିଙ୍ଗ୍, ପରିକାଦୁ ଆରତିମାନି ଲୋକାଙ୍ଗ୍ ସାକା କିଦେଙ୍ଗ୍ ଆଟ୍‌ନାନ୍ ।

୩

ଜିସୁ ମୋସାଦିମାଣୁକୁ ପେରିକାନ୍

୧ କ୍ରିସ୍ତ ବିସ୍‌ବାସି ତଡ଼ାନ୍‌କୁ ନି ତାଙ୍ଗ୍‌କ୍, ମିର୍ ବା ମାପୁରୁଦି ମାଡ଼ାନ୍ କୁକାୟଆତିମାନିଦେର୍ ! ମିର୍ ଜିସୁଦି ବିଷୟ ଚିନ୍ତା କିଦୁ, ଖାନ୍ ମା ଦାମ୍‌ବିସ୍‌ବାସ୍‌ତି ପେରିଜାଜକ ଆନି ଉଣ୍ଡିଙ୍ଗ୍ ମାପୁରୁଦି ମାଡ଼ାନ୍ ପୋକାଇ ଆତାମାନାନ୍ ।

୨ ମୋସା ଏଣ୍ଡେସ୍ ମାପୁରୁଦି ଇଲୁଡୁ ବିସ୍‌ବାସ୍‌ତାନ୍ ପାଣି କିତାମାର୍ହାନ୍, ମାପୁରୁଦି ମାଣୁକୁ ଆସ୍‌କିଆୟଆତି ଜିସୁ ଆୟାଖାଜା ଇୟା ପାଣି ଉଣ୍ଡିଙ୍ଗ୍ ମାପୁରୁଦି ଉଣ୍ଡିଙ୍ଗ୍ ବିସ୍‌ବାସ୍ ମାର୍ହାନ୍ ।

୩ ଇଲୁଦି ବାଦ୍‌ଲୁ ଇଲୁକୁତିଆରକିନିଖାନିଙ୍ଗ୍ ନାଣ୍ଟ ସମ୍ମାନ୍ ସିନାର୍ । ଆୟାଖାଜା ମୋସାଦି ବାଦ୍‌ଲୁ ଜିସୁଙ୍ଗ୍ ନାଣ୍ଟ ସନ୍‌ମାନ୍ ପୋଇଦେଙ୍ଗ୍ ଜିଗ୍‌ମାନାଡ଼ ।

୪ ଝିଜୁ ଇଲୁକୁ ଏନ୍ ସିଲେତିଙ୍ଗ୍ ଏନ୍ ଲୋକା ମାଡ଼ାନ୍ ତିଆର୍ ଆତେମାନେ, ମାତର୍ ମାପୁରୁ ଝିଜୁ ବିସୟତିଙ୍ଗ୍ ତିଆରକିତିକାନ୍ ।

୫ ସେବକ ଖାଇ ମୋସା ମାପୁରୁଦି ଇଲୁଦୁ ବିସ୍ବାସ୍‌ଦାନ ପାଣି କିତାମାର୍ହାନ ମାରି ଆମାଞ୍ଜିଲୁ ବିସୟ ମାପୁରୁ ଖାଜିନିଦିନୁତୁ ସାକ୍ୟ ଝେରୁତେଙ୍ଗ ବଦାକିତା ମାର୍ହାନ, ଆୟା ବିସୟତାନ ମୋସା ଝେରୁତା ମାର୍ହାନ ।

୬ ମାତର କ୍ରିସ୍ତ ମାରିନ୍ ଖାଇ ମାପୁରୁଦି ଇଲୁଦୁ ଜାତୁନ୍ ଅତେଙ୍ଗ ବିସ୍ବାସ୍‌ତିକାନ । ମାତୁ ଜଦି ସାହାସ୍ ଆସ୍‌ସି ଆସାଦି ବିଷୟ ପୋଇନିକା ଇଜି ମା ବିସ୍ବାସ୍‌ଦୁ ତାଟ୍ ମାନାଟ୍, ଆରତିଙ୍ଗ ମାତୁ ଖାନ ଇଲୁଖାଇ ଆନିକା ।

ମାପୁରୁଦି ଲୋକା ଉଣ୍ଡିଙ୍ଗ ରମ୍‌ନିକା

୭ ମାରି ପବିତ୍ର ଆମ୍ବା ଏଣ୍ଡେସ୍ ଇଜିନାଟ୍ :

“ନେରୁ ଜଦି ମିର୍ ମାପୁରୁଦି ବାକ୍ୟ ଝେନୁତୁ,

୮ ଆରତିଙ୍ଗ ମି ପୁର୍ବେଦିତକରାଦାଦାରି ଖାଇ ଜିବନ୍ ଆଟ୍‌ଖା କିମାଟ୍ ।

ମରୁବୁମିଦୁ ଖାର ଆୟା ନାଣ୍ଡିଙ୍ଗ ମାପୁରୁଙ୍ଗୁ ପରିକା କିଜି

ଖାନ ଉଣ୍ଡିଙ୍ଗ ବିରୁଦ୍ କିତାମାର୍ହାର ।

୯ ମାପୁରୁ ଇନାନ, ଆବେନ୍ ଖାର ନା ସାକ୍ତି ନି ସାସ୍ ପରିକା କିତାର,

ମାରିବା ଚାଲିସ୍ ବାର୍ଦ୍ଦେକ୍ ସାଦି ନାନୁ ଏମେ ଝିଲୁ ପାଣି

କିତାମାର୍ହା, ଆକା ଖାର ସୁତୁତାମାର୍ହାର ।

୧୦ ଆଦେଙ୍ଗ ନାନୁ ଖାରି ଉଣ୍ଡିଙ୍ଗ ରିସାଆଜି ଇର୍ହା,

“ଖାର ଝିଲୁଦିନ୍ ଅବିସ୍ବାସ୍‌ତିକାର

ମାରି ନା ମାଟା ମାନାଦେଙ୍ଗ୍ ବଦା କିଏର୍ ।”

୧୧ ନାନୁ ରିସାଦାନ ପାର୍‌ମାଣ୍ କିତା,

ନାନୁ ଏମେ ରାଜିଦୁ ଖାରିଙ୍ଗ ରମ୍‌ଦେଙ୍ଗ୍ ସିତାମାନ୍ଦି, ଆୟା

ଦେସ୍‌ତୁ ଖାର ଏସାଙ୍ଗ୍‌ବା ସନ୍ତେଙ୍ଗ୍ ଆଟ୍‌ଏର୍ !”

୧୨ ଏ ନା ବିସ୍ବାସ୍‌ତି ତଡ୍‌ନକୁ ନି ତାଙ୍ଗ୍‌କ୍, ଜାଗାର୍‌ତା, ମି ଲୋଇରାନ ଆମାଞ୍ଜାନି ଜିବନ୍ ଏଣ୍ଡେସ୍ ପାପ୍ ମାରି ଅବିସ୍ବାସ୍‌ତୁ ପୁରା ଆଜି ଜିବନ୍‌ମାନି ମାପୁରୁଦି ଉଣ୍ଡିଙ୍ଗ ଝେରୁଏ ଆମାଟ୍ ।

୧୩ ମି ମାଡ୍‌ନକୁ ଏନ୍ ଏଣ୍ଡେସ୍ ପାପ୍‌ଦାନ ବେମ୍‌ରି ଆଜି ଆଟ୍‌ଖା ଜିବନ୍ କିମାଟ୍, ଇୟାଉଣ୍ଡିଙ୍ଗ ନିଜେନିଜେଦିଙ୍ଗ୍ ଝିଲୁଦିନ୍ ଝେଡ୍‌କା କିଦୁ

। ମାରି ଦାର୍ମସାସ୍ତ୍ରଦ୍ଵାରା ସାତିମାନି “ନେରୁ” ବଲ୍ଲୁ ଜେ ଆମାସାନ୍ତି ମା ଉଣ୍ଡିଙ୍ଗ ଦରକାର, ଆୟା ସାନ୍ତି ଆକା କିଜିମାଡୁ ।

୧୪ ଜଦି ମାଡୁ ସାରାସାରି ସାନ୍ତି ମା ଆଗଡ଼ିରି ବିସବାସତୁ ତାଟ୍ ମାନାଟ୍, ଆରତିଙ୍ଗ ମାଡୁ ଝିଜେରେ କ୍ରିସ୍ତଦିମାନୁ ମିସାଦେଙ୍ଗ୍ ଆଟ୍‌ନିକା ।

୧୫ ଦାର୍ମସାସ୍ତ୍ରଦ୍ଵାରା ସାତାମାନାଟ୍ :

“ନେରୁ ଜଦି ମିରୁ ମାପୁରୁଦି ବାକ୍ୟ ଝେନିଦେଟ୍,
ଆରତିଙ୍ଗ ମି ତକ୍ରାଦାଦାର ଜିବନ୍ ଆଟୁଝା କିଜି
ମାପୁରୁଦି ଉଣ୍ଡିଙ୍ଗ୍ ଏଣ୍ଡେସ୍ ବିରୁଦ୍ କିତାମାର୍ହାର୍, ଆୟାଝାଜା
କିମାଟ୍ ।”

୧୬ ମାପୁରୁଦି ବାକ୍ୟ ଝେନିଜି ବା ଏମେକାର୍ ଝାନି ଉଣ୍ଡିଙ୍ଗ୍ ବିରୁଦ୍ କିତାମାର୍ହାର୍, ଝାର୍ ଏର୍ ? ଏମେଝାରିଙ୍ଗ୍ ମୋସା ମିସର୍ ଦେସ୍‌ଦାନ୍ ସପ୍ତା ତାତା ମାର୍ହାନ୍, ଆୟାକାର୍ ଆଏର୍‌ନୋ ।

୧୭ ଚାଲିସ୍ ବାର୍ସେକ୍ ସାନ୍ତି ଏମେ ମାପୁରୁଙ୍ଗ୍ ରିସା କିତାମାର୍ହାର୍, ଝାର୍ ଏର୍ ? ଏମେକାର୍ ପାପ୍ ପାଣି କିଜି ମରୁରୁମିଦୁ ସାତା ମାର୍ହାର୍, ଆୟାକାର୍ ।

୧୮ ମାପୁରୁ ନାସ୍ତିଝାଲେ ପାର୍‌ମାଣ୍ କିଜି ଇର୍ହାମାର୍ହାନ୍, ଝାର୍ ଝାନି ରମ୍‌ନିମାନୁ ଏସାଙ୍ଗ୍ ବା ସନ୍‌ଡ୍ରେଙ୍ଗ୍ ଆଟ୍‌ଏର୍, ନାସ୍ତିଝାଲେ ଝାନ୍ ଏମେଝାରି ବିସୟତାନ୍ ଆକା ଇର୍ହାମାର୍ହାନ୍ ? ଏମେକାର୍ ବିରୁଦ୍ କିତାମାର୍ହାର୍ ଝାରି ବିସୟତାନ୍ ଝାନ୍ ଆକା ଇର୍ହାମାର୍ହାନ୍ ।

୧୯ ମାରି ମାଡୁ ସୁଡ଼ଜିନିକା ଜେ, ଝାରି ଅବିସବାସତି ଉଣ୍ଡିଙ୍ଗ୍ ଝାର୍ ଆୟା ପାର୍‌ମାଣ୍ଡି କିଣାନ୍ ଦେସ୍‌ତୁ ସନ୍‌ଡ୍ରେଙ୍ଗ୍ ଆଟ୍‌ଏଟାର୍ ।

୪

୧ ମାଙ୍ଗ୍ ଏମେ କିଣାନ୍ ଦେସ୍ ସିନା ଇଜି ମାପୁରୁ ଇର୍ହାମାର୍ହାନ୍, ଆକା ମାଡୁ ପୋଇଦେଙ୍ଗ୍ ଆଟ୍‌ନିକା ଇଜି ମାପୁରୁ ପାର୍‌ମାଣ୍ କିତାମାନାନ୍ । ଆୟା ପାର୍‌ମାଣ୍ଡି ରମ୍‌ନିମାଣାନ୍ ଏନ୍ ଏଣ୍ଡେସ୍ ତେବାମାକିନ୍, ଆୟା ଉଣ୍ଡିଙ୍ଗ୍ ଜାଗାର୍‌ତା ତେବାଦୁ ।

୨ ଇରିଙ୍ଗ୍ ଖାରିଖାଜା ମାପ୍ ବା ସୁସମାଚାର୍ ଝେରିମାନିକା । ଖାର୍ ଆକା ଝେନ୍ଦି ବା ବିସ୍ବାସ୍ତୁ ମାନାଏତାର୍ । ଆଦେଙ୍ଗ୍ ଖାରି ଉଣ୍ଡିଙ୍ଗ୍ ଆକା ନେଗିକା ଆଏତାଡ୍ ।

୩ ମାତର୍ ମା ଲୋଇରାନ୍ ଏମେକାର୍ ବିସ୍ବାସ୍ କିନାର୍, ଖାର୍ ନେ ମାପୁରୁଦି ପାର୍ମାଣ୍ଡି ରମ୍ବିନିକା ପୋଇନାର୍, ଇରିଙ୍ଗ୍ ମାପୁରୁ ଇର୍ହାମାନାନ୍, ନାନୁ ରିଆଆଜି ପାର୍ମାଣ୍ଡି କିତା :

ଖାର୍ ନା ରମ୍ବିନିମାନୁ ସନ୍ତେଙ୍ଗ୍ ଆଟ୍‌ଏର୍ । ମାରିବା ଇୟା ରମ୍ବିନିକା ଦୁନିଆଦି ତିଆର୍ ଆନି ବେଡାଦାନ୍ ତିଆର୍ଆତା ମାନାଡ୍ ।

୪ ଦାମ୍‌ସାସ୍ତୁଦି ଏମେ ଉନ୍ତ୍ରି ବାଡିଦୁ “ସାଡ୍ ଦିନ୍” ବିସ୍ବତାନ୍ ଇୟାଖାଜା ରାସାତାମାନାଡ୍, “ମାପୁରୁ ଖାନି ଝିନ୍ଦୁ ପାଣି ପୁରାକିଜି ସାଡ୍ ଦିନ୍ତୁ ରମିତାନ୍ ।”

୫ ମାରି ଇୟା ବିସ୍ବତାନ୍ ଆଇମାନୁ ରାସାତାମାନାଡ୍, ମାପୁରୁ ଇର୍ହାନ୍, “ଖାର୍ ନା ରମ୍ବିନିମାନୁ ଏସାଙ୍ଗ୍ ବା ସନ୍ତେଙ୍ଗ୍ ଆଟ୍‌ଏର୍ ।”

୬ ଏମେକାର୍ ଆଗ୍ତିନେ ସୁସମାଚାର୍ ଝେର୍ଆମାହାର୍, ନିଜେଦି ଅବିସ୍ବାସ୍ ଉଣ୍ଡିଙ୍ଗ୍ ଆୟା ରମ୍ବିନିକା ପୟ୍‌ଦେଙ୍ଗ୍ ଆଟ୍‌ଏତା ମାହାର୍ । ଇଲେଇ, ଆଇକାର୍ ଆୟା ରମ୍ବିନିକା ପୟ୍‌ଦେଙ୍ଗ୍ ସୁଜୋଗ୍ ପୋଇତାମାନାର୍;

୭ ଇରିଙ୍ଗ୍ ଖାରି ଉଣ୍ଡିଙ୍ଗ୍ ମାପୁରୁ ଆଇ ଉନ୍ତ୍ରି ଦିନ୍ ତିଆର୍ କିତାମାନାନ୍ ମାରି ଆକା ଆଜିନାଡ୍, “ନେରୁ ।” ନେଗି ବେଡାଦୁ ନାଣ୍ ବାସେକ୍ ଝେନ୍ଦିକା ମାପୁରୁ ରାଜା ଦାଉଦଦି ମାଡାନ୍ ଇୟା ବିସ୍ବ ରାସାତିମାନି ସାସ୍ତ୍ର ବାକ୍ୟଦୁ ଝେର୍ତା ମାହାନ୍ :

“ନେରୁ ଜଦି ମିର୍ ମାପୁରୁଦି ବାକ୍ୟ ଝେନିଦେର୍, ଆର୍ଡିଙ୍ଗ୍ ଜିବନ୍ ଆଟ୍‌ଝା କିମାଟ୍ ।”

୮ ଜଦି ଯିହୋସୁୟ ଲୋକାଙ୍ଗ୍ ମାପୁରୁଦି ପାର୍ମାଣ୍ଡି ରମ୍ବିନିକା ସିଦେଙ୍ଗ୍ ଆଟ୍‌ତାନ୍‌ମାଦି, ଆର୍ଡିଙ୍ଗ୍ ମାପୁରୁ ଝେନ୍ଦିକା ଆଇ ମାରିଉନ୍ତ୍ରି ରମ୍ବିନିଦିନ୍ ମାଟା ରାସ୍‌ତାନ୍‌ମାଦି ।

୯ ମାରି ଇକା ସଡ୍ ଜେ, ସାଡ୍‌ଦିନ୍ତୁ ମାପୁରୁ ରମ୍ବି ଖାଜା, ଖାନି ଲୋକା ଉଣ୍ଡିଙ୍ଗ୍ ଉଣ୍ଡି ରମ୍ବି ଝେଡା ଇତାୟ୍‌ଆତାମାନାଡ୍ ।

୧୦ ମାପୁରୁ ଏଣେସ୍ ନିଜେଦି ପାଣିଦାନ ରମିତାନ, ଏନ୍ ମାପୁରୁଦି ପାରମାଣ୍ଡି ରମିନିମାନୁ ଡଗ୍ରିତା ମାନାନାନ, ଖାନ ବା ନିଜେଦି ପାଣିଦି ଖାନନ୍ଦିମାଣୁକୁ ରମିନାନ ।

୧୧ ମା ଲୋଇରାନ ଏନ୍ ଏଣେସ୍ ନିଜେଦି ଅବିସ୍ବାସ୍ ଉଣ୍ଡିଙ୍ଗ୍ ଆୟା ଲୋକା ଖଜା ଇୟା ରମିନିମାଣାନୁ ତେବାଏନ୍, ଇୟାଉଣ୍ଡିଙ୍ଗ୍ ଆଟ୍ଟିନି ସାନ୍ଦି ସେସ୍ତା କିନାଟ୍ ।

୧୨ ମାପୁରୁଦି ବାକ୍ୟ ଜିବନ୍ ମାରି ସାକ୍ତିମାନିକା । ଆକା ରିୟାଙ୍ଗାଦି ଦାରା କାଣ୍ଡା ବାଦ୍ଲୁ ନାଣ୍ଡ ଦାରା; ଆମାମାନୁ ଆମା ନି ଜିବନ୍ ମାରି ସିରେଙ୍ଗ୍ ୍ନି ପେଡେନ୍‌ରସ୍ ଲୋଇ, ମାରି ଲୋକା ଜିବନ୍ତି ଆସା ମାରି ଚିନ୍ତାଦି ବିଚାର କିନିକା ।

୧୩ ମାପୁରୁଦି ମାଡାନ ଇନି ବିସୟ ମାରଗେଏଡ୍; ଝିଜୁ ତିଆରଆତିମାନୁ ଝିଜୁ ବିସୟ ଖାନି ଝିଜୁସୁଡ଼ଜୁନି କାଣ୍ଡୁ ଆଗ୍ଡି କେରପାୟ ଆଏଡ୍ ମାରି ରେଆତାମାନାଡ୍ । ଆୟା ମାପୁରୁଦି ଆଗ୍ଡି ମାଙ୍ଗ୍ ଇସାବ୍ ସିଦେଙ୍ଗ୍ ପୋଡାନାଡ୍ ।

ଝିଜେରିଙ୍ଗ୍ ପେରିଜାଜକ ଜିସୁ

୧୪ ଆଦେଙ୍ଗ୍ ୍ନି ମାଡୁ ଏମେ ଦାମ୍ବୁବିସ୍ବାସ୍ତିଙ୍ଗ୍ ମାନାଜିନିକା, ଆକା ଆଟ୍ଟାଦାନ ଆସ୍ତି ଇଡ୍‌ଦେଙ୍ଗ୍ ଆନାଡ୍; ଇରିଙ୍ଗ୍ ୍ନି ମା ଝିଜେରିଙ୍ଗ୍ ପେରିଯାଜକ, ମାପୁରୁଦି ମାରିନ୍ ଜିସୁ, ମାପୁରୁଦି ଲାକ୍‌ତୁ ସର୍ହାମାନାନ ।

୧୫ ଏନ୍ ମା ଦୋସ୍ ଦୁର୍ବଲ୍ ଚିନ୍ତା କିଦେଙ୍ଗ୍ ଆଟ୍‌ଏର୍, ଆୟାଖଜା ପେରିଯାଜକ ଖାନ ଆଏନ୍ । ମାତର୍ ମା ପେରିଯାଜକ, ମା ଖଜା ଝିଜୁଦି ପରିକାଦୁ ଆରତାମାର୍ହାନ, ମାତର୍ ଖାନ ପାପ୍‌କିଏଣ୍‌ଗା ତେବାତାନ;

୧୬ ଆଦେଙ୍ଗ୍ ୍ନି ମାପ୍ ସାସ୍ତାନ ମାପୁରୁଦି ଦୟା ରାଜାଗାଦି ଲାକ୍‌ତୁ ସନ୍‌ଡେଙ୍ଗ୍ ଆଟ୍‌ନାପ୍ । ଆବେନ୍ ମା ଟିକ୍ ବେଡାଦୁ ମା ନେଗି ଉଣ୍ଡିଙ୍ଗ୍ ଦୟା ନି ଦୟା ପୟନାପ୍ ।



୧ ଝିଜେରେ ପେରିଯାଜକ ନିଜେଜାତିଦି ଲୋକା ଲୋଇରାନ ବାସେଆଜି ମାରି ନିୟୁକ୍ତ ଆନାଟ୍ । ଖାନ ଖାରି ତରିଟାନ୍ ପାପ୍ କେମା

ଉଣ୍ଡିଏ ବଲି ନି ପୁଜା ସିଜି ମାପୁରୁକୁଁ ସେବା କିନାର ।

୨ ଖାନ୍ ନିଜେ ଆଇଆଇ ଜାତିଦି ଦୋସ୍ ଦୁର୍ବଲତୁ ପୁରାଆଜିମାନିଙ୍କୁ
ଦୋସ୍ କିଜିମାନି ବୁଦିସିଲି ଲୋକା ଉଣ୍ଡିଏ ଖାନ୍ କାର୍ମୁ ସୁଣାନ୍ ।

୩ ମାରି, କେବଲ ଜେ ଆଇଖାରି ପାପ୍ ଉଣ୍ଡିଏ ଖାନିଙ୍କୁ ପୁଜା
ସିଦେଙ୍କୁ ପୋଡ଼ାନାଡ଼, ଆକା ସିଲେ, ମାତର୍ ଖାନି ନିଜେଦି ପାପ୍
ଉଣ୍ଡିଏ ବା ଖାନିଙ୍କୁ ପୁଜା ସିଦେଙ୍କୁ ପୋଡ଼ାନାଡ଼ ।

୪ ଏନ୍ ନିଜେ ନିଜେଦିଙ୍କୁ ପେରିଜାଜକଦି ସମ୍ମାନ ପଦତୁ ବାସେ
ଆଦେଙ୍କୁ ଆର୍ଏନ୍ । ହାରୋଗଦି ଖାଜା ଜେ କେବଲ ମାପୁରୁଦି
ମାଡ଼ାନ୍ ବାସେଆତାମାର୍ହାନ୍, ଖାନ୍ ପେରିଜାଜକ ପଦ ପୋଇନାନ୍ ।

୫ ଆୟାଖାଜା ପେରିଜାଜକ ପଦଦୁ ସନ୍ମାନ ପୟଦେଙ୍କୁ କ୍ରିସ୍ତ
ନିଜେଦିଙ୍କୁ ଆସକିଆଏନ୍ ମାରାନ୍ । ମାରି ମାପୁରୁ ଖାନିଙ୍କୁ ଆସକିଜି
ଇର୍ହାମାର୍ହାନ୍,

“ନିନୁ ନା ମାରିନ୍,

ନେରୁ ନାନୁ ମି ବୁବା ଆତା ।”

୬ ଆଇ ବାତିଦୁ ଖାନ୍ ଇକାବା ଇର୍ହାମାନାନ୍,

“ନିନୁ ଜାଜକ ପଦଦୁ ମଲ୍‌କିସେଦକଦି ଉତ୍ତରାଦିକାରି ଖାଜା

ଝିଜୁଦିନତି ଉଣ୍ଡିଏ ଜାଜକ ତେବାନି ।”

୭ ✨ଆମା ମାପୁରୁ ଖାନି ସାନିମାଣୁକୁ ରକିୟା କିଦେଙ୍କୁ ଆର୍ଏନ୍, ଖାନି
ଲାକୁତୁ ମାପୁରୁ ଇୟା ଜିବନ୍ତୁ ଆଡ଼ବାଜି କାଣେରୁକୁଁ ଖାକ୍‌ସି
ବାତିଙ୍କୁମାଲ୍‌ଜି ପାର୍ତନା କିତାମାର୍ହାନ୍ । ଖାନ୍ ସାନ୍ତି ନି ଦାର୍ମୁ
ଆତିମାନିଙ୍କୁ, ମାପୁରୁ ଖାନି ପାର୍ତନା ଖେର୍ହାନ୍ ।

୮ ଜଦିବା ଖାନ୍ ମାପୁରୁଦି ମାରିନ୍ ମାର୍ହାନ୍, ଖାନ୍ ଦୁଃକ୍ ବୋଗଦି
ମାଡ଼ାନ୍ ମାନାଦେଙ୍କୁ ଅଜାତାନ୍ ।

୯ ଇୟାଖାଜା ମାପୁରୁ ଖାନିଙ୍କୁ ଅରେନ୍ ନେଗି ପେରି ଜାଜକ ଇଜି
ଜଗ୍ ଆସକିତାନ୍, ଖାନ୍ ଖାନି ମାଟାମାନାନି ଲୋକା ଉଣ୍ଡିଏ ଝିଜୁଦିନତି
ରକିୟାଦି ଖେଡ଼ିକା ଆତାନ୍ ।

୧୦ ମାରି ଖାନ୍ ମଲ୍‌କିସେଦକଦି ଉତ୍ତରାଦିକାରି ଖାଜା
ପେରିଜାଜକ ଆତାନ୍ ଇଜି ମାପୁରୁ ଖେର୍ତାନ୍ ।

✧ ୫:୨ ମାତିଉ ୨୭:୩୭-୪୭; ମାର୍କ ୧୪:୩୨-୪୨; ଲୁକ ୨୨:୩୯-୪୭.

ବିସ୍ବାସ ଡିସନି ବିସୟତାନ୍ ଜାଗାରତା ମାତା

୧୧ ଇୟା ବିସୟତାନ୍ ମା ନାଶ୍ତ ମାଟେଙ୍ଗ ମିଙ୍ଗ୍ ଖେରତେଙ୍ଗ୍ ବଦା କିଜିନାପ୍ । ମାତର୍ ମି ବୁଜାନି ସାକ୍ତି ଉଣା । ଆଦେଙ୍ଗ୍ ମିଙ୍ଗ୍ ବୁଜାକିନିକା ବେସିକାସ୍ । ଇରିଙ୍ଗ୍ ମିର୍ ଆମ୍ବିକ ଜିବନ୍ତୁ ଖେନ୍ତେଙ୍ଗ୍ ସିତିଡି ।

୧୨ ☆ମିର୍ ଆଇଞ୍ଜାରିଙ୍ଗ୍ ସିକିୟା ସିନି ବେଡା ଆତାଡନି, ଆତିଙ୍ଗ୍ ଇଲେ ବା ମାପୁରୁଦି ବାକ୍ୟଦି ପାରତୁମ୍ ବିସୟଞ୍ଜିକୁ ମିଙ୍ଗ୍ ସିକିୟା ସିଦେଙ୍ଗ୍ ଗୁରୁ ଦରକାର ଆଜିନାଡ୍ । ମିର୍ ଆଟୁଞ୍ଜା କାଦି ଉଣି ବାଦ୍ଲୁ ଇୟାସାନ୍ ପାଲୁ ଉଣିଜିନିଦେର୍ ।

୧୩ ଏନ୍ ଖାରୁଇ ପାଲୁ ଉଣାନ୍, ଖାନ୍ ଇସ୍ତି କୋଡ୍ଦି ଅବସ୍ଥାଦାନ୍ ମାନାନ୍ । ନେଗି ତାଗ୍ଗ ବିସୟତାନ୍ ଖାନି ବୁଦି ଆଏଦେ ।

୧୪ ଆଇ ତରିଚାନ୍ ଆଟ୍ଞା କାଦି ପେରିବୟସ୍ତି ଲୋକା ଉଣ୍ଡିଙ୍ଗ୍; ଖାର ଜିବନ୍ତି ଆଇଆଇ ବୁଦିଦାନ୍ ନେଗିକା ନି ତାଗ୍ଗ ବିସୟତାନ୍ ନେସ୍ନାର୍ ।



୧ ମାରି ମାତୁ ଏଣ୍ଡେସକି କ୍ରିସ୍ତଦାମ୍ବୁଦି ପାରତୁମ୍ ବିସୟଞ୍ଜିକୁ ଡିସ୍ସି ସଡ୍ଡି ମାଟେଙ୍ଗ୍ଞିକୁ ଅଜାଦେଙ୍ଗ୍ ଆଗ୍ଡି ସନିକା ମାନାଡ୍ । ମାତୁ ଦାମ୍ବୁବିସ୍ବାସତି ପାରତୁମ୍ ବିସୟଞ୍ଜିକୁ ଆତାଡ୍, ତାଗ୍ଗ ପାଣିଦାନ୍ ତେବାଜି ମାପୁରୁଦିମାନୁ ବିସ୍ବାସ କିନାଡ୍ ।

୨ ତୁବନ୍ ଅନି ବିସୟତାନ୍ ସିକିୟା, କିୟୁ ମୁସ୍ତକୁ ପେରନିକା, ପେରି ବିଚାର୍, ସାତିକାର୍ ମାରିଡେସିନିଙ୍ଗ୍ କା ମାରି ଏସ୍କାଙ୍ଗ୍ଞିଜିଲ ଦଣ୍ଡ ଞ୍ଜିକୁ ମାଟେଙ୍ଗ୍ ନିୟମ ମାରିଡେସି ତିଆର୍ କିଦେଙ୍ଗ୍ ଦରକାରସିଲେ ।

୩ ମାଙ୍ଗ୍ ଇଲେଇ ଆଗ୍ଡି ସନ୍ତେଙ୍ଗ୍ ଆନାଡ୍ । ମାପୁରୁଦି ମୁସ୍ତକୁ ଆସା ଇଡ୍ଡି ଇକାନେ ମାତୁ କିନାଡ୍ ।

୪ ଏମେକାର୍ ବିସ୍ବାସ ଆରାକିତାମାନାର୍, ଖାର୍ ଏଡ୍‌କିଜି ଡେସି ଖାଦେଙ୍ଗ୍ ଆଟ୍‌ନାର୍ ନୋ ? ଖାର୍ ଅର୍ଲେନ୍ ମାପୁରୁଦି ଜାୟୁ ବାସାଜିମାର୍ହାର୍, ମୁସ୍ତକୁପୁରତି ଦାନତି ସାଞ୍ଜି ପୋୟୁଜି, ପବିତ୍ରଆମ୍ବୁଦିଙ୍ଗ୍ ପୋଇତା ମାର୍ହାର୍,

୫ ଖାର ମାପୁରୁଦି ନେଗି ବାକ୍ୟଦିଙ୍କ ପୟତା ମାର୍ହାର ମାରି ଖାଜିନି ଜୁଗତି ସାକ୍ତି ଏଡ଼ କିତାମାର୍ହାର ।

୬ ମାରିବା ଖାର ବିସ୍ବାସ ଆରାକିତାମାନାର । ଆଦେଙ୍କୁ ମାରିତେସି ଏଡ଼କିନି ଉଣ୍ଡିଙ୍କ ଖାରିଙ୍କ ଡେସି ଖେରତେଙ୍କ ଆଟ୍ଟକା, ଇରିଙ୍କ ଖାର ମାପୁରୁଦି ମାରିନତିଙ୍କ ମାରିତେସି କୁସକାଟ୍ଟୁ ଡାକ୍ସି ଖିଜେରି ଲୋକା ଆଗଡ଼ି ସେମାର କିଜିନାର ।

୭ ଇରିଙ୍କ ଆମା ବୁମି ନିଜେଦି ମୁସକୁ ଜାରିଦିଙ୍କଜାରି ମୁଜିତି ପିରୁଏରୁ ଉଣାଡ଼, ମାରିଆମାଖାରି ଉଣ୍ଡିଙ୍କ ଆକା ପାସି କିଆୟଆନାଡ଼, ଖାରି ନେଗି ପାସି ସିନାଡ଼, ଆୟା ଭୁମିଦିଙ୍କ ମାପୁରୁ ଆସିବାଦ୍ କିନାନ ।

୮ ମାତର ଆୟା ବୁମିଦୁ ଜଦି ସାମ୍ମାରାନ ମାରି ଲାଟା ନେରିସ୍ କିନାଡ଼, ଆରତିଙ୍କ ଆୟାତାନି ଇନି ପାଣି ତେବାଏଡ଼ । ଆକା ମାପୁରୁଦି ଅବିସାପ୍ତିକା ଆନାଡ଼ ମାରି ସିସୁଦୁ ନାସୁ ଆନାଡ଼ ।

୯ ମାତର ଏ ଲାଡ଼ତିଲୋକୁ, ମାପ୍ ଜଦି ଇୟାଖାଜା ମାଟା ଖେରସିନା, ମାରିବା ମି ଅବସ୍ଥା ଜେ ଆୟାତାନିମାଣୁକୁ ନେଗିକା ମାରି ପରିତ୍ରାଣଦି ଖାଲେ ମିସାତାମାନାଡ଼, ଇକା ମାପ୍ ଆଟ୍ଟାଦାନ ବିସ୍ବାସ କିଜିନାପ୍ ।

୧୦ ମାପୁରୁ ଅନ୍ୟାୟ କିଏନ୍ । ମି ପାଣି ସେବା, ବିସେସ୍ କିଜି ଆଇ ବିସ୍ବାସରିଙ୍କ ସାହାଜ୍ୟ କିଜି ମାପୁରୁଦି ଉଣ୍ଡିଙ୍କ ମିର୍ ଆମା ଜିବନ୍ନୋନିକା ତରସି ଖାଜିନିଦେର୍, ଆକା ଖାନ ବାଣାଏନ୍ ।

୧୧ ମା ଉନ୍‌ଶ୍ଚି ବଦା, ସାରାସାରି ସାନ୍ଦି ଆଇଖାରି ଉଣ୍ଡିଙ୍କ ମି ଜିବନ୍ନୋନିକା ଖିଜୁଦିନ୍ ମାନିଡ଼ । ଆରତିଙ୍କ, ମି ଆସା କିତିମାନି ଖିଜୁ ବିସୟ ପୁରା ଆନାଡ଼ ।

୧୨ ଆରତିଙ୍କ ମିର୍ ଏସାଙ୍କ ଗାଡ଼ିଆ ଆଏଣ୍‌ଗା ଆଟ୍ଟା ବିସ୍ବାସ ମାରି ସାସମାନି ଲୋକା ଖେନକାସାନଡ଼ୁ ମାରି ମାପୁରୁ ପାରମାଣ୍ କିତିମାନି ଖିଜୁ ବିସୟ ପୟଦୁ ।

ମାପୁରୁଦି ପାରମାଣ୍ ଆଟ୍ଟା

୧୩ ଅବାହାମତିଙ୍କ ମାପୁରୁ ଏସ୍ତିଖାଲେ ଆଦେସ୍ ସିତାନ, ନାସ୍ତିଖାଲେ ଖାନ ଖାନି ଆଦେସ୍ ରକୟା କିନାନ ଇଜି ପାରମାଣ୍

କିତାମାନାନ୍ । ଖାନି ବାଦଲୁ ପେରିକାନ୍ ଏନ୍ ସିଲିତିଙ୍ଗ୍ ଖାନ୍ ନିଜେଦି
ଦରୁଦାନ୍ ପାର୍ମାଣ୍ କିତାମାର୍ହାନ୍ ।

୧୪ ଖାନ୍ ଇର୍ହାମାର୍ହାନ୍, “ନାନ୍ ମିଙ୍ଗ୍ ଆସ ବାଦ୍ କିନା, ମି
କୁଟୁମ୍ବତିଙ୍ଗ୍ ନାଣ୍ଡାନ୍ ନାଣ୍ଡ ପିରିସ୍ କିନା ।”

୧୫ ଅବ୍ରାହାମ ସାହାସ୍ ଆସ୍ କାପ୍ କିତାନ୍ । ଆଦେଙ୍ଗ୍ ଖାନ୍
ମାପୁରୁଦି ପାର୍ମାଣ୍ ବିସୟକୁଞ୍ଜୁ ପୋଇତାନ୍ ।

୧୬ ଲୋକୁ ପାର୍ମାଣ୍ କିନିଞ୍ଜାଲେ ନିଜେଦିମାଣ୍ଡୁକୁ ପେରି ଲୋକ୍ତି
ଦରୁଦାନ୍ ପାର୍ମାଣ୍ କିନାର୍, ଇୟାଞ୍ଜା ପାର୍ମାଣ୍ କିନିମାଡାନ୍ ଖିଜୁ
ଜାଟିଜଗଡ଼ା ଖିଜିନାଡ଼ ।

୧୭ ମାପୁରୁ ଏମେଞ୍ଜାରିଙ୍ଗ୍ ଆୟାଞ୍ଜୁ ବିଷୟ ଦାନ୍ କିନାନ୍ ଇଜି
ପାର୍ମାଣ୍ କିତାମାର୍ହାନ୍, ଆୟା ପାର୍ମାଣ୍ଡୁ ଖାନ୍ ତାଟ୍ ତେବାନାନ୍
ଇଜି ଖାରିଙ୍ଗ୍ ପୁରାନେସ୍ ନିଞ୍ଜାଜା ଖେରୁନି ଉଣ୍ଡିଙ୍ଗ୍ ଖାନ୍ ଖାନି ବାଦ୍ତି
ଞ୍ଜାଲେ ପାର୍ମାଣ୍ ମିସା କିତାମାର୍ହାନ୍ ।

୧୮ ଖାନି ବାଦ୍ ମାରି ପାର୍ମାଣ୍ ବାଦ୍ଲେଆଏତାଡ଼, ଆକା ରୁକିସ୍
ମାପୁରୁ ମିସ୍ ଖେରୁନିକାନ୍ ଆଏନ୍ । ଆୟାମାଣ୍ଡୁ ଆଗ୍ତି ମାନି
ଆସାଦିଙ୍ଗ୍ ଆସିନି ଉଣ୍ଡିଙ୍ଗ୍ ତରୁନିବାଡିଦୁ ଉରୁକ୍ତାପ୍ ଜେ ମାପ୍, ମାପ୍
ତାଟ୍ ଖେଡିକା ପୋଇନାପ୍ ।

୧୯ ଇୟା ଆସା ମା ଜିବନ୍ତି ତଅକା ଞ୍ଜାଜା । ଇକା ଆସାସିନିକା ନି
ରକିୟାକିନିକା ମାରି ମୁସ୍ କୁପୁରୁତି ମନ୍ଦିରତି ପାର୍ଦାଦିଙ୍ଗ୍ ବରୋକିଜି
ମହାପବିତ୍ର ବାଡିଦୁ ଇଦେଙ୍ଗ୍ ଆଟାମାନାଡ଼ ।

୨୦ ମା ପାଣିକିନିସିନି ଞ୍ଜାଜା ଜିସୁ ଆଗ୍ତିନେ ଆବେନ୍ ସର୍ହାନ୍ନି
। ଖାନ୍ ମଲ୍ କିସେଦକତି ଉତରାଦିକାରି ଞ୍ଜାଜା ଖିଜୁଦିନ୍ତି ଉଣ୍ଡିଙ୍ଗ୍
ପେରିଜାଜକ ଆତାମାନାନ୍ ।



ମଲ୍ କିସେଦକତି ଜାଜକ ପଦ୍

୧ ଇୟା ମଲ୍ କିସେଦକ ସାଲେମତି ରାଜା ମାରି ପେରି ମାପୁରୁଦି
ଜାଜକ ମାର୍ହାନ୍ । ଅବ୍ରାହାମ ନି ଖାନି ସାଙ୍ଗର୍ ଏସିଞ୍ଜାଲେ ନାଲ୍ ଏର୍
ରାଜାରିଙ୍ଗ୍ ଆରାକିଜି ଜୁଦ୍ଦାନ୍ ଖାଜିମାରୁଇ ବେଡାଦୁ, ନାସ୍ତିଞ୍ଜାଲେ
ମଲ୍ କିସେଦକ ଖାନିଙ୍ଗ୍ ବେଟ୍ ଆଜି ଆସିବାଦ୍ କିତାମାର୍ହାନ୍ ।

୨ ମାରି ଅବ୍ରାହାମ ଖାନିଙ୍ଗ୍ ଜୁଇଦୁଜିଣାତି ସମ୍ପତ୍ତିଦି ଏକ ଦସମାଂସ ସିତାମାରାନ୍ । ମଲ୍ଲକିସେଦକଦି ଦରୁଦି ଆଗୁଡ଼ିରି ଅର୍ଥ ଆଜିନାଡ଼ “ଦାର୍ମୁଦି ରାଜା” ଖାନ୍ ସାଲେମତି ରାଜାଦି ଅର୍ଥ ଆଜିନାଡ଼ “ସାନ୍ତି ରାଜା ।”

୩ ମଲ୍ଲକିସେଦକଦି ବୁବା କି ଯାୟା ମାରି କୁଟୁମ୍ ନି ଖାନି ଜନମ୍ ମାରି ଜିବନ୍ତି ବିସୟତାନ୍ ଇନିକା ବା ଜାଣା ସିଲେଡ଼ । ଖାନ୍ ମାପୁରୁଦି ମାରିନ୍ ଖାଜା; ଓଜୁଦିନ୍ ଜାଜକ ଆଜି ତେବାଜି ଖାତାମାନାନ୍ ।

୪ ଅଡ଼ବିଜ ସୁଡ଼ୁ, ଇୟା ଲୋକ୍ ଏଣ୍ଡେସ୍ ପେରିକାନ୍ । ମା ଝେଙ୍ଗ୍ ତ ପୁର୍ବେଦତକରା ଅବ୍ରାହାମ ଜୁଇଦୁଜିଣାତି ସମ୍ପତ୍ତିଦି ଏକ ଦସମାଂସ ଖାନିଙ୍ଗ୍ ସିତାମାରାନ୍ ।

୫ ଲେବିରି ଆମା କୁଟୁମ୍ତିକାର୍ ଜାଜକ ପାଣି କିନାର୍, ଖାର୍ ମୋସାଦି ନିୟମ୍ତି ଇସାବତାନ୍ ଇସ୍ରାଏଲ୍ତି ତଡ଼ାନ୍କା ମାଣୁକୁ ଦସମାଂସ ଦାନ ଲସ୍ନାର୍, ଇସ୍ରାଏଲ୍ତିଲୋକୁ ଅବ୍ରାହାମଦି କୁଟୁମ୍ ମାରି ଲେବିରି ନିଜେ ଜାତିଆତିଙ୍ ବା ଖାରିମାଡ଼ାନ୍କୁ ଇୟା ଦସ୍ବାର୍ ଲସ୍ସିମାର୍ହାର୍ ।

୬ ମଲ୍ଲକିସେଦକ ଲେବି କୁଟୁମ୍ତିକାନ୍ ଆସତିଙ୍ ବା, ଖାନ୍ ମାପୁରୁଦି ପାରମାଣ୍ଡି ଅବ୍ରାହାମଦିମାଡ଼ାନ୍ ଏକ ଦସମାଂସ ଦାନ ପୋଇଜି ଖାନିଙ୍ଗ୍ ଆସିର୍ବାଦ୍ କିତାମାର୍ହାନ୍ ।

୭ ଆସିର୍ବାଦ୍ କିନି ଲୋକୁ ଆସିର୍ବାଦ୍ ପୋଇନି ଲୋକାମାଣୁକୁ ଏନ୍ ପେରିକାନ୍, ଇବେନ୍ନୁ ଇନିକା ଅଡ଼ବିନିକା ସିଲେଡ଼ ।

୮ ଏକ ଦସମାଂସ ଦାନ ଲସ୍ନି ଯାଜକର୍ ସାତିଖାଜା ଲୋକୁ, ମାତର୍ ମଲ୍ଲକିସେଦକ ସାସ୍ତ୍ରଦି ବାକ୍ୟ ଇସାବତାନ୍ ଖାନ୍ ଇଲେଇବା ଜିବନ୍ମାନାନ୍ ।

୯ ମାରି ଅବ୍ରାହାମ ମଲ୍ଲକିସେଦକଦିଙ୍ ଦସ୍ବାର୍ତାନ୍ ଉନ୍ତୁ ବାର୍ ଦାନ ସିତିଖାଲେ, ଏମେ ଲେବିଦି କୁଟୁମ୍ତି ଯାଜକର୍ ଇଲେଇ ଦସମାଂସ ଦାନ୍ ଲସ୍ସିନାର୍, ଆୟା ଲେବି ବା ମଲ୍ଲକିସେଦକଦିଙ୍ ଆୟା ଦାନ୍ ସିତାମାରାନ୍ ଇଜି ଇନ୍ତେଙ୍ଗ୍ ଆଟ୍ନିକା ।

୧୦ ଲେବି ନାସ୍ତିଖାଲେ ଜନମ୍ ଆଏନ୍ ମାରାନ୍ ସଡ଼, ମାତର୍ ଅବ୍ରାହାମ ମଲ୍ଲକିସେଦକଦିଙ୍ ବେଟ୍ ଆତିଖାଲେ

ପୁର୍ବେଦିତକରାଦାଦା ଅବ୍ରାହାମଦି କୁଟୁମ୍ବି ଖାଜା ଲେବି ଖାନି
ମେନ୍ଦଲୁତୁ ମାର୍ଥାନ ଇଜି ଇରିଙ୍ଗବା ବୁଲୁ ଆଏଡ଼ ।

୧୧ ଇୟା ଲେବିୟରି ଜାଜକଦି ମାନାଜି ଇସ୍ରାଏଲ ଜାତିଦିଙ୍ଗୁ ଖାନି
ନିୟମ୍ ସିଆୟ ଆତାମାର୍ହାଡ଼ । ଲେବିୟରି ପାଣି ଜଦି ସାରାସାରି
ଆତାଡ଼ମାନ୍ଦି, ଆରତିଙ୍ଗୁ ହାରୋଣଦି ଉତରାଦିକାରି ଇୟା ଲେବିୟ
ଜାଜକରିଙ୍ଗୁ ଡିସ୍‌ସି ସିଜି, ମଲ୍‌କିସେଦକଦି ଉତରାଦିକାରି ଖାଜା
ଆଇକାନ୍ ଅରେନ୍ ଜାଜକ ଖାଦେଙ୍ଗୁ ଇନିକା ଦରକାର୍ ମାର୍ହାଡ଼ ।

୧୨ ଜାଜକ କୁଟୁମ୍ବି ବାଦ୍‌ଲେ ଆତିଙ୍ଗୁ ନିୟମ୍‌ତୁ ବା ବାଦ୍‌ଲେ ଆନି
ଦରକାର୍ ।

୧୩ ଏମେଖାନି ବିସୟତାନ୍ ମାପ୍ ଇୟାଞ୍ଜି ମାଟା ଇଜିନାପ୍, ମା
ଆୟା ପ୍ରବୁ ଜିସୁ ଆଇ ଉନ୍‌ଡ୍ରୁ କୁଟୁମ୍ ମାର୍ହାନ୍; ଆୟା କୁଟୁମ୍‌ତୁ ଏନ୍
ଏସାଙ୍ଗୁ ଯାଜକ ପାଣି କିଏର୍ ।

୧୪ ଇକା ଟିକ୍ ଜେ, ଖାନ୍ ଜିହୁଦା କୁଟୁମ୍‌ତୁ ଜନମ୍ ଆତା ମାର୍ହାନ୍
ମାରି ଯାଜକ ଆନି ଉଣ୍ଡିଙ୍ଗୁ ମୋସା ଇୟା କୁଟୁମ୍‌ତି ଦରୁ ରାସ୍‌ଏନ୍ ।

ମଲ୍‌କିସେଦକଦି ଖାଜା ଅରେନ୍ ଜାଜକ

୧୫ ଇବେନ୍‌ ଟିକ୍ ବୁଜାଜିନାଡ଼ ଜେ, ମଲ୍‌କିସେଦକଦି ଖାଜା ଆଇ
ଅରେନ୍ ଜାଜକ ଖାତାନ୍ ।

୧୬ ମାତର୍ ଖାନ୍ ଲୋକ୍ ତିଆରକିତି ନିୟମ୍ ମାରି ପଦ୍‌ତି ମାଡାନ୍
ଜାଜକ ଆଏନ୍ ମାର୍ହାନ୍; ଝିଙ୍ଗୁ ଜିବନ୍‌ତି ସାକ୍ତି ପାଣି ଖାନ୍ ଯାଜକ
ଆତାମାର୍ହାନ୍ ।

୧୭ ଇରିଙ୍ଗୁ ଦର୍ମସାସ୍ତ୍ରତୁ ରାସାତା ମାନାଡ଼, “ନିନ୍‌ ମଲ୍‌କିସେଦକଦି
ଉତରାଦିକାରି ଖାଜା ଝିଙ୍ଗୁଦିନ୍‌ତି ଯାଜକ ଆନି ।”

୧୮ ଇବେନ୍‌ ପାଡ଼ଇ ନିୟମ୍ ସାକ୍ତିସିଲେଡ଼ ମାରି ଦରକାର୍
ସିଲେତାଡ଼ଆକା ତାନିଙ୍ଗୁ ଡିସ୍‌ତା ସିତାର୍ ।

୧୯ ଇରିଙ୍ଗୁ ମୋସା ସିତିମାନି ନିୟମ୍‌ତାନ୍ ଇନି ବିସୟ ପୁରା
ପୋଇଦେଙ୍ଗୁ ଆଟ୍‌ଏତାର୍ । ଇଲେଇ ମାଙ୍ଗୁ ଉନ୍‌ଡ୍ରୁ ସାହାସ୍‌ତି ଆସା
ସିତାମାନାନ୍; ଆୟାମାଡାନ୍ ମାପୁ ମାପୁରୁଦି ଲାକୁଡୁଆନି ଉଣ୍ଡିଙ୍ଗୁ
ଆଟ୍‌ତାମାନାନ୍ ।

୨୦ ନାଶ୍ୱଦାନ ନାଶ୍ୱ ମା ଉଣ୍ଡିଙ୍ଗ ମାପୁରୁଦି ପାରମାଣ୍ ବା ମାନାତ୍ । ହାରଣଦି କୁଟୁମ୍ବିକାର ଯାଜକ ପଦଦୁ ଆସକିଆୟା ଆତିଝାଲେ ଇୟାଝାଜା ଇନି ପାରମାଣ୍ ସିଆୟ୍‌ଏଡ଼ ମାରାତ୍ ।

୨୧ ମାତର୍ କ୍ରିସ୍ତ ଯାଜକ ଆନି ବେଡ଼ାଦୁ ମାପୁରୁ ପାରମାଣ୍ କିଜି ଝାନିଙ୍ଗ୍ ଝେର୍ତାମାର୍ହାର୍,

“ପ୍ରବୁ ଉନ୍‌ଡ୍ର ପାରମାଣ୍ କିତାମାନାନ୍”

ଝାନ୍ ଝାନି ପାରମାଣ୍ ବାଦ୍‌ଲେ କିଏନ୍ :

ନିନ୍‌ ଝିଜୁଦିନ୍‌ତି ଜାଜକ ଆନି ।

୨୨ ଇୟା ମାଟା ଉଣ୍ଡିଙ୍ଗ୍ ଜିସୁ ଉଡ୍ର ପେରି ନିୟମ୍‌ତି ପୁରା ସିତାମାନାନ୍ ।

୨୩ କେବଲ୍ ପାଡ଼ିଇ ନିୟମ୍‌ତୁ ବା ଆଇ ଯାଜକର୍ ସାତିସରିଝାଜା ଆତିମାନିଙ୍ଗ୍ ଝାର ସାତି ଝେନ୍‌କା ଆଇକାର୍ ଜାଜକ ଆନାର୍; ଆଦେଙ୍ଗ୍ ଝାର ଇସାପତୁ ନାଶ୍ୱ ମାନାର୍ ।

୨୪ ମାତର୍ ଜିସୁ ଝିଜୁଦିନ୍‌ ଜିବନ୍‌ମାନାନ୍ । ଝାନି ଜାଜକ ପାଣି ବା ଝିଜୁଦିନ୍‌ ।

୨୫ ଆଦେଙ୍ଗ୍ ଏମେକାର୍ ଝାନି ମାଡ଼ାନ୍ ମାପୁରୁଦି ଲାକୁତୁ ସନାର୍, ଝାରିଙ୍ଗ୍ ରକିୟା କିଦେଙ୍ଗ୍ ଝାନ୍ ଇଲେଇ ମାରି ଝିଜୁଦିନ୍‌ ତାଟ୍ ମାନାନ୍, ମାତର୍ ଝାରି ଉଣ୍ଡିଙ୍ଗ୍ ମାପୁରୁଦି ଲାକୁତୁ ପାର୍ତନା କିଦେଙ୍ଗ୍ ଝାନ୍ ଝିଜୁଦିନ୍‌ ଜିତାମାନାନ୍ ।

୨୬ ଆର୍ତିଙ୍ଗ୍ ମା ଝିଜୁ ଉଣା ପୁରା କିଦେଙ୍ଗ୍ ଜିସୁନେ ଅରେନ୍ ମାତ୍ର ପେରିଯାଜକ । ଝାନ୍ ପବିତ୍ର, ପାପ୍‌ଦସ୍ ସିଲିକାନ୍, ପାପି ଲୋକାମାଣ୍‌କୁ ଆକମାନିକାନ୍, ମୁସକୁପୁର୍ତୁ ପରିକାନ୍ ଆତାନ୍ ।

୨୭ ଝାନ୍ ଆଇଆଇ ପେରିଜାଜକରି ଝାଜା ଆଏନ୍; ଝାରି ଝାଜା ଝାନିଙ୍ଗ୍ ଆଗୁଡ଼ି ନିଜେଦି ପାପ୍ ଉଣ୍ଡିଙ୍ଗ୍ ମାରି ଝେନ୍‌କା ଆଇଝାରି ପାପ୍ ଉଣ୍ଡିଙ୍ଗ୍ ଝିଜୁଦିନ୍‌ ପୁଜା ସିଦେଙ୍ଗ୍ ପୋଡ଼ାଏଡ଼ । ଝାନ୍ ନିଜେଦିଙ୍ଗ୍ ପୁଜା ସିଜି ଉଡ୍ର ଦେବାନେ ଆଇ ଆଇ ବଲିସିଜି ପାଣି କିତାମାର୍ହାନ୍ ।

୨୮ ମୋସାଦି ନିୟମ୍ ଇସାବ୍‌ତାନ୍ ବାସେଆତି ପେରିଜାଜକରି ଦୋସ୍ ଦୁର୍ବଲ ମାନାତ୍; ମାତର୍ ନିୟମ୍ ତିଆରକିତି ଝେନ୍‌କାରି ବେଡ଼ାଦୁ ମାପୁରୁ ନିଜେଦି ବାଦ୍ ମାରି ପାରମାଣ୍ ଇସାବ୍‌ତାନ୍ ଝାନି ଏମେ ମାରିନ୍‌ତିଙ୍ଗ୍ ପେରିଜାଜକ ଝାଜା ବାସେ କିତାନ୍, ଝାନ୍ ଝିଜୁଦିନ୍‌ତିଙ୍ଗ୍ ଉଣ୍ଡିଙ୍ଗ୍ ପୁରା ଆତାମାନାନ୍ ।



କ୍ରିଷ୍ଣ ମା ପେରିଜାଜକ

୧ ମା ମାଟାଦି ଅର୍ଥ ଇକା ମାତୁ ଏମେ ପେରିଜାଜକଦିଙ୍ଗ ପୋଇତିମାନିକା, ଖାନ୍ ମୁସ୍କୁପୁରୁତୁ ମହାମହିମା ମାପୁରୁଦି ସିଂହାସନଦି ଉଣେରି କିୟୁ ତରିନ୍ ବାସ୍ତାମାନାନ୍ ।

୨ ଖାନ୍ ଏମେ ମହାପବିତ୍ର ବାଡିଦୁ ତିଆର୍ଆତିମାନି ଗୁଡ଼ା ଆତିଗି ପେରିଜାଜକ ଖାଜା ପାଣି କିନାନ୍, ଆକା ଲୋକା ମାଡାନ୍ ତିଆର୍ ଆଏଡ଼, ତାନିଙ୍ଗ ପ୍ରବୁ ତିଆର୍ କିତାମାନାନ୍ ।

୩ ଝିଜେରେ ପେରିଜାଜକର୍ ମାପୁରୁଦି ଉଦେସ୍‌ଦାନ୍ ପୁଜା ମାରି ଜାତୁବଲି ପୁଜା କିଦେଙ୍ଗ ବାସେଆତା ମାନାର୍ । ଆଦେଙ୍ଗ ମା ପେରିଜାଜକ ବା ଆୟାଖାଜା ଇନି ପୁଜା କିଦେଙ୍ଗ ଦରକାର୍ ମାନାଡ଼ ।

୪ ଖାନ୍ ଜଦି ଇୟା ଦୁନିଆଦୁ ମାରିଙ୍ଗ, ଆର୍ଡିଙ୍ଗ ଖାନ୍ ମୁଡ଼ୁକ ଜାଜକ ଆଦେଙ୍ଗ ଆର୍ଏତାନ୍‌ମାନ୍, ଇରିଙ୍ଗ ଜିହୁଦିର୍ ନିୟମ୍ ଇସାବ୍‌ତାନ୍ ପୁଜା ସିଦେଙ୍ଗ ଜାଜକର୍ ମାନାର୍ ।

୫ ଖାରି ଜାଜକରି ସେବା ପାଣି ମୁସ୍କୁପୁରୁତି ବିସୟତି କାତା ନିତିଗାମାତ୍ର । ମୋସାଦି ବେଡାଦାନ୍ ଇୟାଖାଜା ଆଜି ଖାଜିନାଡ଼ । ମୋସା ଏସ୍ତିଖାଲେ ଉପାସନା ଉଣ୍ଡିଙ୍ଗ ଉନ୍‌ଣ୍ଡି ଗୁଡ଼ା ତିଆର୍ କିଦେଙ୍ଗ ସୋଲ୍‌ସିମାରାନ୍, ମାପୁରୁ ଖାନିଙ୍ଗ ଇର୍ହାମାର୍ହାନ୍, “ସୁଡୁଆ, ଗୋରନ୍ ମୁସ୍କୁ ନିଙ୍ଗ ଏମେ ବାନା ତୋର୍‌ସି ସିତାମାନା ଟିକ୍ ଆୟା ଇସାବ୍‌ତାନ୍ ଝିଜୁ ବିସୟ ତିଆର୍ କିଆ ।”

୬ ମାତର୍ ଇଲେଇ ଜିସୁଙ୍ଗ୍ ଏମେ ଜାଜକ ପାଣି ସିଆୟ ଆତାମାନାଡ଼, ଆକା ଆଇଖାରି ଜାଜକିୟ ପାଣି ବାଦଲୁ ନେଗିକା । ଆୟାଖାଜା ମାପୁରୁ ମାରି ଲୋକା ଲୋଇ ଖାନ୍ ଏମେ ନିୟମ୍ ତିଆର୍ କିତାମାନାନ୍, ଆକା ପେରିକା, ଇରିଙ୍ଗ ଇୟା ନିୟମ୍‌ଦୁ ନେଗି ବିସୟଝିଜୁ ସିଆୟ ଆନି ଉଣ୍ଡିଙ୍ଗ ପାର୍‌ମାଣ୍ ମାନାଡ଼ ।

୭ ଆଗଡ଼ିରି ନିୟମ୍‌ତୁ ଜଦି ଦସ୍ ସିଲେତାଡ଼‌ମାନ୍, ଆର୍ଡିଙ୍ଗ ମାରିଉନ୍‌ଡ଼ି ନିୟମ୍ ଦରକାର୍ ସିଲେତାଡ଼‌ମାନ୍ ।

୮ ମାତର୍ ମାପୁରୁ ଖାନି ଲୋକାଙ୍ଗ ଦୋସ୍ ଆସ୍‌ସି ଇର୍ହାମାନାନ୍,
“ପ୍ରବୁ ଇଜିନାନ୍, ବେଡ଼ା ଖାଜିନାଡ଼,

ଏସ୍ତିଝାଲେ ନାନୁ ଇସ୍ରାଏଲ ସିଲ୍ତିଙ୍ଗ୍ ଜିହୁଦାଦି ଲୋକାଝାଲେ
ଏକ ପୁନି ନିୟମ୍ ତିଆର୍ କିନା ।

୯ ନାନୁ ଝାରି ପୁର୍ବେଦିତକ୍‌ରାରିଙ୍ଗ୍ କିୟ୍ ଆସ୍‌ସି ମିସର୍ ଦେସ୍‌ତାନ୍
ସୋପ୍‌ସି ତାନି ଝାଲେ

ଏମେ ନିୟମ କିତାମାର୍‌ହା, ଇୟା ନିୟମ୍ ଆୟାଝାଜା ଆଏତେ ।

ନାନୁ ଝାରିଝାଲେ ଏମେ ନିୟମ୍ କିତାମାର୍‌ହା,

ଆବେନ୍ ଝାର ବିସ୍‌ବାସ୍‌ ତେବାଏତାର୍‌;

ଆଦେଙ୍ଗ୍ ନାନୁ ଝାରି ଉଣ୍ଡିଙ୍ଗ୍ ମୋନ୍‌ଦିୟାନ୍ ସିଏତା ।

୧୦ ପ୍ରବୁ ଇଜିନାନ୍,

ନାନୁ ବବିସ୍‌ତ୍ରୁ ଇସ୍ରାଏଲ୍‌ତି ଲୋକା ଝାଲେ ଇୟା ନିୟମ୍ କିନା

ନାନୁ ନା ନିୟମ୍ ଝାରି ମନ୍‌ପାଟାଦୁ

ମାରି ଜିବନ୍‌ତି ପାଟାଦୁ ରାସ୍‌ନା ।

ନାନୁ ଝାରି ମାପୁରୁ ଆନା,

ଝାର୍‌ ନା ଲୋକ୍ ଆନାର୍ ।

୧୧ ନାସ୍ତିଝାଲେ ଝାର ଲାକ୍‌ତୁରି ତଡାନ୍‌କାଙ୍ଗ୍ ସିକିୟା ସିଦେଙ୍ଗ୍

ଦରକାର୍ ଆଏଡ୍‌ନି,

ମାରି ଦେସ୍‌ତି ଲୋକାଙ୍ଗ୍

‘ପ୍ରବୁଦି ବିସୟ୍ ଝେରୁଡୁ,’

ଇୟା ମାଟା ଝେରୁଡେଙ୍ଗ୍ ଦରକାର୍ ଆଏଡ୍‌ନି,

ଇରିଙ୍ଗ୍ ଇସ୍ତିଲୋକା ମାଣାନ୍‌କୁ ପେରିଲୋକା ସାନ୍ତି ଝିଜେରେ

ନା ପରିଚୟ୍ ନେସ୍‌ନାର୍ ।

୧୨ ନାନୁ ଝାରି ଝିଜୁ ପାପ୍ କେମା କିନା

ମାରି ଝାରିଦି ଇନି ଅନ୍‌ୟାୟ୍ ମୋନତୁ ଏଡ୍ ଇଡେଏ ।”

୧୩ ଇୟାତେନିଙ୍ଗ୍ ପୁନି ନିୟମ୍ ଇଜି ରାସ୍‌ନି ମାଡାନ୍ ମାପୁରୁ

ଆଗଡ୍‌ରିତାନିଙ୍ଗ୍ ପାଡ୍‌ଇକା ଇଜି ଇର୍‌ହାମାନାନ୍ ମାରି ଆମାକା

ପାଡ୍‌ଇକା ମାରି ସାଲାଏଡ୍, ଆକା ବେଗି ମାର୍‌ଗିନା ସନାଡ୍ ।



ଆଡ୍‌ଗିପୁର୍ ନି ମୁସ୍‌କୁପୁର୍‌ତି ପାର୍‌ତନା

୧ ପାରତୁମ୍ଭି ନିୟମ୍ଭୁ ପାରତନାଦି ସାରି ନି ଲୋକୁ ତିଆରକିତି ଉଣ୍ଡି ସେବା କିନି ଇଲ୍ଲୁ ବିସୟତାନ୍ ରାସାତା ମାର୍ହାତ୍ ।

୨ ଆୟାଈସାବତାନ୍ ଉଣ୍ଡି ପାରତନା କିନି ଗୁଡ଼ା ତିଆର ଆତାମାର୍ହାତ୍ । ଆବେନ୍ ମାନି ପାରତୁମ୍ଭି ବାକ୍‌ରା ପବିତ୍ର ବାତି ଇନ୍‌ଜିମାର୍ହାତ୍ । ଇୟା ଲୋଇ ଦିଝା ଇଡ଼ନି ବାତି, ଉନ୍‌ଡ୍ରୁ ଟେବୁଲ୍ ମାରି ଟେବୁଲ୍ ମୁସୁକୁ ମାପୁରୁଦି ଉଦେସ୍‌ତାନ୍ ପୁଜା ସିତିମାର୍‌ଇ ରୁଟି ମାର୍ହାତ୍ ।

୩ ପାରଦା ଝେନ୍‌କା ଏମେ ମାରିଉଣ୍ଡି ବାକ୍‌ରା ମାର୍ହାତ୍, ତାନିଙ୍ଗ୍ ମହାପବିତ୍ର ବାତି ଇନ୍‌ଜିମାର୍ହାତ୍ ।

୪ ଆବେନ୍ ଉନ୍‌ଡ୍ରୁ ବାଙ୍ଗାମ୍‌ରାମ୍‌ତି ଦୁପୁଣି ବେଦି ମାରି ବାଙ୍ଗାମ୍‌ରାମ୍‌ତି ତିଆରଆତି “ନିୟମ୍ ପେଡ଼ା” ମାର୍ହାତ୍ । ଇୟା ପେଡ଼ା ଲୋଇ “ମାନ୍ନା” ମାନି ଉନ୍‌ଡ୍ରୁ ବାଙ୍ଗାମ୍‌ରାମ୍‌ତି ସାଟି, ହାରୋଣ୍‌ତି କାୟ୍‌ତି ବାତିଗା ମାରି ମାପୁରୁଦି ମାଟା ରାସାତି ରୁଣ୍ଡି କାଲୁକୁ ପାଟା ମାର୍ହେ ।

୫ ସିନ୍‌କପେଡ଼ା ମୁସୁକୁ ମାପୁରୁଦି ଆବେନ୍‌ମାନଜି ତରାୟ୍‌ଆନି ଝାଜା ରେକେଙ୍ଗ୍‌ମାନି ରୁଣ୍ଡି ଲୋକ୍‌ଦି ମୁତ୍ ମାର୍ହାତ୍ । ଇୟାକାର୍ “ପାପ୍‌କେମା” ବାତି ମୁସୁକୁ ରେକେଙ୍ଗ୍ ଅସାର୍ କିଜି ତେବାତାମାର୍ହାତ୍, ମାତର୍ ଇଲେଇ ଇୟା ଝିଜୁଦି ବିସୟ ନେଗେନ୍‌ତାନ୍ ଝେର୍‌ତେଙ୍ଗ୍ ଦରକାର୍ ସିଲେ ।

୬ ଆବେନ୍ ଇୟାଝାଜା ନିୟମ୍ ମାନାତ୍ ଯାଜକର୍ ଝିଜୁଦିନ୍ ଗୁଡ଼ାଦି ପାରତୁମ୍ ବାକ୍‌ରାଦୁ ଡଗୁଜି ଝାରି ସେବା ପାଣି ପୁରା କିନାର୍ ।

୭ ମାତର୍ ମାରିଉନ୍‌ଡ୍ରୁ ବାକ୍‌ରା ଲୋଇ କେବଲ ପେରିଜାଜକଦି ସୋନି ଅଦିକାର୍ ମାନାତ୍, ଝାନ୍ ଆବେ ବାର୍‌କେକ୍‌ତିଙ୍ଗ୍ ଅରୁସୁ ମାତ୍ର ସନାନ୍ । ଝାନ୍ ନିଜେଦି ଉଣ୍ଡିଙ୍ଗ୍ ମାରି ଲୋକୁ ନେସ୍‌ଏଣ୍ଡା କିତିମାନି ପାପ ଉଣ୍ଡିଙ୍ଗ୍ ମାପୁରୁଦି ଉଦେସ୍‌ତାନ୍ ପୁଜା ସିଦେଙ୍ଗ୍ ଅର୍‌ସେ ନେତେର୍ ଆସ୍‌ସି ସନାନ୍ ।

୮ ଇୟାଝିଜୁ ବିସୟତାନ୍ ପବିତ୍ର ଆମ୍ବା ଇୟା ମାଟା ନେଗେନ୍‌ତାନ୍ ସିକିୟା ସିତାମାନାତ୍ ଜେ, ପାରତୁମ୍ଭି ବାକ୍‌ରା ମାନି ସାନ୍, ମହାପବିତ୍ର ବାତିଦୁ ସନି ସାରି ରେଆଏଡ୍ ।

୯ ଇଲେଇତି ବେଡ଼ା ସୁଡ଼୍‌ଜି ଇକା ଉନ୍‌ଡ୍ରୁ କାତା ଝାଜା । ତେନି ଅର୍ତ୍ତ

ଆଜିନାଡ଼, ମାପୁରୁଦି ଉଦେସ୍ତାନ ପୁଜାସିତିମାନିକା ମାରି ପସୁବଳି
ଉପାସ୍ତକିନିଞ୍ଜାନି ବୁଦିଦିଙ୍ଗ ପୁରା କିଦେଙ୍ଗ ଆଟ୍‌ଏଡ଼ ।

୧୦ ଇରିଙ୍ଗ ଆୟାଞ୍ଜିକୁ କେବଳ ଉଣି କାଦି ମାରି ସୁଚିକିନି ଉଣିଙ୍ଗ
ଆଡ଼ରେରି ପାଣି ମାଡ଼ । ମାପୁରୁଦି ପୁନି ନିୟମ୍‌ତି ତିଆର୍‌ଆନି ସାଦି
ଆୟାଞ୍ଜିକୁଦି ଦରକାର ମାର୍‌ହାଡ଼ ।

୧୧ ମାତର ଇଲେଇ ଏମେ ଞ୍ଜିକୁ ନେଗି ବିସୟ ମାଡ଼
ପୋୟତିମାନିକା, ଆୟାଞ୍ଜିକୁଦି ପେରିଜାଜକ ଖାଜା କ୍ରିସ୍ତ ଖାତାମାନାନ୍
। ଖାନ୍ ଏମେ ପାରତନା ଗୁଡ଼ାଦୁ ପାଣି କିଜିନାନ୍, ଆକା ପେରିକା ମାରି
ନାଣ୍ଟ ବର୍ତ୍ତିଦିକା । ଆକା ଲୋକୁ ତିଆର୍ କିତିକା ଆଏଡ଼ । ମାରି
ଆକା ଇୟା ଦୁନିଆଦି ସିନା ଆଏଡ଼ ।

୧୨ କ୍ରିସ୍ତ ଆୟା ଗୁଡ଼ା ନାଡ଼୍‌ସିଜି ଆୟା ମହାପବିତ୍ର ବାଡ଼ିଦୁ
ଉନ୍‌ଡ଼େଦେବାଦି ଉଣିଙ୍ଗ ଡ଼ରୁନି ଖାଲେ ଆବେନ୍ ବଲିସିନି ଉଣିଙ୍ଗ
ଗରିଏଙ୍ଗ୍ ସିଲେତିଙ୍ଗ ଡ଼ାକା ନେତେର୍ ଆସ୍‌ସି ସଲ୍‌ଏନ୍ ମାର୍‌ହାନ୍
। ମାତର ଖାନ୍ ନିଜେଦି ନେତେର୍ ଅସି ମା ଉଣିଙ୍ଗ ଞ୍ଜିକୁଦିନ୍‌ଡ଼ିଙ୍ଗ
ମୁକୁଡ଼ାନି ପାଣି କିତାନ୍ ।

୧୩ ପାଡ଼ିଇ ନିୟମ୍‌ତାନ୍ ଏମେକାର୍ ରିତିନିତି ପାଣି ମାନାଇ ଉଣିଙ୍ଗ
ଅସୁଚି, ଖାରି ମୁସୁକୁ ଗରିଏଙ୍ଗ୍ ସିଲେତିଙ୍ଗ ଡ଼ାକା ନେତେର୍ ମାରି
ଡ଼ାକା ନିର୍ ଖାକାତିଙ୍ଗ, ଖାରି ଅସୁଚି ଆକ ଆନାସନାଡ଼ ।

୧୪ ଇକା ଜଦି ସଡ଼ ଆନାମାନାଡ଼, ଆଡ଼ତିଙ୍ଗ କ୍ରିସ୍ତଦି ନେତେର୍ ମାରି
ଏସ ନାଣ୍ଟ ପାଣି ସିନିକା ଆଏଡ଼ ? ଞ୍ଜିକୁଦିନ୍‌ଡ଼ି ଆମ୍ବାଦି ସାକାଦାନ୍
ଖାନ୍ ନିଜେଦିଙ୍ଗ ମାପୁରୁଦି ଉଦେସ୍ତାନ ଉନ୍‌ଡ଼ି ଦସ୍‌ସିଲି ପୁଜା ଖାଜା
ସିତାମାନାନ୍ । ଖାନି ଆୟା ନେତେର୍ ଦାନ୍ ତାଗଇ ରିତିନିତି ପାଣିଦାନ୍
ନେଗେନ୍ ଆଜି ମା ବୁଦି ଟିକ୍‌ଆନାଡ଼ ମାରି ମାପ୍ ଜିବନ୍‌ମାନି ମାପୁରୁଦି
ଟିକ୍ ସେବା କିଦେଙ୍ଗ ସୁଜୋଗ୍ ପୋୟନାପ୍ ।

୧୫ ଇୟାଉଣିଙ୍ଗ କ୍ରିସ୍ତ ନେ ପୁନି ନିୟମ୍ ତିଆର୍ କିତାମାନାନ୍,
ଏଣ୍ଡେସ୍‌କି ଏମେକାର୍ ମାପୁରୁଦି ମାଡ଼ାନ୍ କୁକାୟାତାମାନାର୍, ଖାର୍
ମାପୁରୁ ପାରମାଣ୍ କିତିମାନି ଏସକାଙ୍ଗ୍‌ଞ୍ଜିଇ ଆସିର୍ବାଦ୍ ପୋଇନାର୍
। ପାର୍‌ଡ଼ୁମ୍ ନିୟମ୍ ପାଣିକିଜିମାନି ବେଡ଼ାଦୁ, ଲୋକୁ ଏମେ ଞ୍ଜିକୁ ପାପ୍
ଦୋସ୍ କିତାମାର୍‌ହାଡ଼, କେବଳ କ୍ରିସ୍ତଦି ସାତିମାଡ଼ାନ୍ ଖାର୍ ଆବେର୍‌କୁ
ମୁକୁଡ଼ାନିକା ପୋଇନାର୍ ।

୧୭ ଉଣ୍ଡି ସିନି ଆକୁଦି ନିୟମ୍ ଇସାବତାନ, ଆକା ପାଣି ଆନି ଉଣ୍ଡି ନିୟମ୍ କିତିମାନି ଲୋକ୍ ଦି ସାନିକା ପାର୍ମାଣ୍ ଆନିକା ଦରକାର ।

୧୮ ଇରିଙ୍ଗ ନିୟମ୍ କିତିମାନି ଲୋକ୍ ଜିନିମାନି ସାନ୍ଦି, ନିୟମ୍ତି ପାଣି ସିଲେଡ୍; କେବଲ୍ ଖାନି ସାତି ଖେନ୍କାନେ ଆକା ତାଟି ପାଣି ଆନାଡ୍ ।

୧୯ ଆୟାଉଣ୍ଡିଙ୍ଗ୍ ପାର୍ତୁମ୍ ନିୟମ୍ ବା ନେତେରସିନି ମାଡାନ୍ ପାଣି ଆତାମାର୍ହାଡ୍ ।

୨୦ ପାର୍ତୁମ୍ ମୋସା ନିୟମ୍ତି ଆଦେସ୍କୁ ଲୋକା ଲାକୁଡୁ ଖେରତାର୍ । ତାନିଖେନ୍କା ଖାନ୍ ଡାକ୍ ନି ଗରିଏଙ୍ଗା ନେତେର ଏରୁଦି ଖାଲେ ମିସାକିଜି ଏସୋବ କମା ମାରି ଏସ ରଙ୍ଗତି ମେଣ୍ଡା ବୁରୁବୁସେଙ୍ଗ୍ ଦାନ୍ ନିୟମ୍ ବଇ ମାରି ଲୋକା ମୁସୁକୁ ଲଜିତାନ୍ ।

୨୧ ଖାନ୍ ଇର୍ହାନ୍, “ଏମେ ନିୟମ୍ ମାନାଦେଙ୍ଗ୍ ମାପୁରୁ ମିଙ୍ଗ୍ ଆଦେସ୍ ସିତାମାନାନ୍, ଇୟା ନେତେର ଆୟା ନିୟମ୍ତିଙ୍ଗ୍ ଟାପ୍ ଡେୟଜିନାଡ୍ ।”

୨୨ ମୋସା ଆୟା ଇସାବତାନ୍ ନେତେର ଅସି ଗୁଡା ମାରି ପାର୍ତନାଡୁ ବ୍ୟବହାର୍ ଆଜିମାନି ଖିଜୁ ଜିନିସ୍ ମୁସୁକୁ ଲଜିତାନ୍ ।

୨୩ ମାରି ମୋସାଦି, ନିୟମ୍ ଇସାବତାନ୍ ଖିଜୁ ବିସୟ୍ ନେତେର ମାଡାନ୍ ପବିତ୍ରଆନାଡ୍ ମାରି ନେତେରସିନି ମାଡାନ୍ ନେ ପାପ କେମା ଆନାଡ୍ ।

କ୍ରିସ୍ତଦି ବଲିସିନିକା ପାପ୍ ଆକ କିନାଡ୍

୨୪ ଆମା ବିସୟ୍ଖିଜୁ ମୁସକୁପୁରତି ମୁଲ୍ ବିସୟ୍ଦି ରୁପ୍ ମାଡୁ, ଆୟାଖିଜୁ ନେତେରତାନ୍ ପବିତ୍ର ଆନିକା ଦରକାର ମାର୍ହାଡ୍, ମାତର ମୁସକୁପୁରତି ବିସୟ୍ତି ଉଣ୍ଡିଙ୍ଗ୍ ନେଗି ବଲିଦାନ୍ ଦରକାର ।

୨୫ ଆମାକା ଲୋକା କିୟୁଦୁ ତିଆର୍ ଆଏଡ୍, ଇୟାଖାଜା ଉଣ୍ଡି ପବିତ୍ର ବାଡିଦୁ କ୍ରିସ୍ତ ସୋର୍ହାମାନାନ୍ । ଆକା ଇନି ମୁଲ୍ ବିସୟ୍ଦି ରୁପ୍ ସିଲେ । ଖାନ୍ ମୁସକୁପୁରତୁ ନେ ସୋର୍ହାମାନାନ୍ । ଆବେନ୍ ଖାନ୍ ମା ଉଣ୍ଡିଙ୍ଗ୍ ଇଲେଇ ମାପୁରୁଦି ଆଗ୍ତି ସର୍ହାମାନାନ୍ ।

୨୫ ଜିହ୍ଵାଦିରି ପେରିଯାଜକ ଏଣେସ୍ ବାର୍ଦ୍ଧେକ୍ତିଙ୍ଗ ଅର୍ସୁ ଜାତୁ ନେତେର୍ ଅସି ମହାପବିତ୍ର ବାଡ଼ିତୁ ସୋନାନ୍ । ଆୟାଞ୍ଜା କ୍ରିସ୍ ନିଜେଦିଙ୍ଗ ରିଜାମୁଜା ପୁଜା କିନି ଉଣ୍ଡିଙ୍ଗ ଆବେନ୍ ସୋଲ୍ଏନ୍ ।

୨୬ ଆର୍ଡିଙ୍ଗ୍, ଖାନିଙ୍ଗ୍ ଦୁନିଆଦି ତିଆର୍ଆତି ବେଡାଦାନ୍ ନାଣ୍ଡଦେବେଙ୍ଗ ଦୁଃକ୍କାସୁ ବୋଗାଦେଙ୍ଗ ପୋଡାତାଡ଼ମାନ୍ । ମାରି ଖାନ୍ ଜୁଗ୍ସେସ୍ଆନି ବେଡାଦୁ ନିଜେଦିଙ୍ଗ ବଲି ଖାଜା ସିନି ମାଡାନ୍ କାଡା କାଡାଦିଙ୍ଗ ପାପତି ସାଲ୍ଲି ମେଡ଼ିକିନି ଉଣ୍ଡିଙ୍ଗ ଖାତାମାହାନ୍ ।

୨୭ ଝିଜେରେ ଉନ୍‌ଣେ ଦେବା ସାନାର୍ ମାରି ତାନିଝେନ୍‌କା ମାପୁରୁଦି ବିଚାର୍ଦି ଆଗ୍ଡି ନିନାର୍ ।

୨୮ ଆୟାଞ୍ଜା ଝିଜୁଲୋକା ଉଣ୍ଡିଙ୍ଗ ପାପ୍ ଆକ କିଦେଙ୍ଗ କ୍ରିସ୍ ଉନ୍‌ଣେ ଦେବାଦି ଉଣ୍ଡିଙ୍ଗ ବଲି ଖାଜା ସିଆୟ୍ ଆତାନ୍ । ଖାନ୍ ମାରିଉଣ୍ଡି ଦେବା ଖାନାନ୍ । ନାସ୍ତିଖାଲେ ମାରି ପାପତି ଜୁଦ୍ କିନି ଉଣ୍ଡିଙ୍ଗ ଖାନ୍ ରେଏନ୍ । ଖାନ୍ ଖାନାନ୍, ଖାନି ଉଣ୍ଡିଙ୍ଗ କାପ୍‌କିଜିମାନି ଲୋକାଙ୍ଗ୍ ଉଦ୍ଧାର୍ କିନି ଉଣ୍ଡିଙ୍ଗ ଖାନାନ୍ ।

୧୦

୧ ଜିହ୍ଵାଦିୟ ନିୟମ୍ ସଡ଼ ବିସୟଦି ଉଣ୍ଡି ପୁରା ମାରି ଟିକ୍‌ଆୟାନାନି ମୁତ୍ ଆଏଡ଼, ଇକା ଖାଜିନିଦିନ୍ତି ନେଗି ବିସୟଦି ଉଣ୍ଡି ନେସ୍‌ନିନାନି ମାଟା ମାଡ଼ । ଝିଜୁଖାଲେ ବାର୍ଦ୍ଧେକ୍ତିଙ୍ଗ ବାର୍ଦ୍ଧେକ୍ ଆୟା ଉନ୍‌ଣି ରକମ୍ତି ପୁଜା କିଆୟ୍‌ଆଜିନାଡ଼ । ଏମେକାର୍ ମାପୁରୁଦି ଲାକୁଡୁ ଖାନାର୍, ନିୟମ୍‌ଦି ଆୟାଝିଜୁ ବଲିଦାନ୍‌ତାନ୍ ଖାର୍ ଇନିକା ନେଗିକା ଆଦେଙ୍ଗ୍ ଆର୍ସିନାର୍ ?

୨ ଇୟାଞ୍ଜାନେ ମାପୁରୁଦି ଉପାସ୍‌କିନିକାର୍ ଜଦି ସଡ଼ତାନ୍ ପାପଦାନ୍ ନେଗେନ୍ ଆଦେଙ୍ଗ୍ ଆର୍ଡ଼ତାରମାନ୍, ଆର୍ଡିଙ୍ଗ୍ ଖାର୍ ମାରି ନିଜେଦି ବୁଦିଦିଙ୍ଗ ପାପି ଇଜି ଅଡ଼ବିଏତାର ମାନ୍ ମାରି ଝିଜୁ ପୁଜାସିନିକା ଝିଜିତାଡ଼ମାନ୍ ।

୩ ମାତର, ଆୟାଞ୍ଜା ଆଏଜି ବାର୍ଦ୍ଧେକ୍ତିଙ୍ଗ ବାର୍ଦ୍ଧେକ୍ ପୁଜାସିନି ମାଡାନ୍ ଲୋକୁଦିଙ୍ଗ୍ କେବଲ ଖାନି ପାପ୍ ବିସୟ୍ ଏଡ଼ କିବିସ୍ କିଆୟ୍‌ଆଜିନାଡ଼ ।

୪ ଇରିଙ୍ଗ ଡାନ୍ ନି ଗରିଏଙ୍ଗା ନେତେର୍ ଏସାଙ୍ଗବା ପାପ୍ କେମା କିଦେଙ୍ଗ ଆଟ୍‌ଏଡ୍ ।

୫ ଆୟା ଉଣ୍ଡିଙ୍ଗ କ୍ରିସ୍ତ ଦୁନିଆଦୁ ଖାନି ପୁର୍ବେଦାନ୍ ମାପୁରୁଙ୍ଗୁ ଇର୍ହାମାର୍ହାନ୍,

“ପୁଜା ନି ଦାନ୍‌ତୁ ନିନ୍ନୁ ଝେଡ଼ିକା ସିଲେ,

ମାତର ନିନ୍ନୁ ନା ଉଣ୍ଡିଙ୍ଗ ଉନ୍‌ଡ୍ରୁ ମେନ୍‌ଲ୍‌ ତିଆର୍ କିତିମାନି ।

୬ ପାପ୍‌କେମା ଉଣ୍ଡିଙ୍ଗ ନିନ୍ନୁ ବେଦି ମୁସୁକୁ ହୋମବଲିଦୁ

ସିଲେଡିଙ୍ଗ ପସୁବଲିଦୁ ଝେଡ଼ିକା ଆଇଦେର୍ ।

୭ ଆଦେଙ୍ଗ ନାନ୍ନୁ ଇର୍ହା, ଏ ମାପୁରୁ ନା

ବିସୟତାନ୍ ନିୟମ ବଇଦୁ ଏଣ୍ଡେସ ରାସାତା ମାନାଡ୍,

ନାନ୍ନୁ ଆୟା ରକମ୍‌ତାନ୍ ନି ବଦା ପୁରା କିଦେଙ୍ଗ ତିଆର୍ ମାନା
।”

୮ ପାରୁଡ଼ମ୍ ଖାନ୍ ଇର୍ହାମାର୍ହାନ୍, “ନିନ୍ନୁ ଲୋକା ପାପ୍ କେମା ଉଣ୍ଡିଙ୍ଗ ପୁଜା ନି ଦାନ୍‌ସିନିକା ସିଲେଡିଙ୍ଗ ବେଦି ମୁସୁକୁ ହୋମବଲି ବଦା କିଜ୍; ଆୟାଝିନ୍ନୁ ମିଙ୍ଗ୍ ଝେଡ଼ିକା କିଦେଙ୍ଗ ଆଟ୍‌ଏଡ୍ ।” ଇୟାଝିନ୍ନୁ ବଲିଦାନ୍ ନିୟମ ଇସାବ୍‌ତାନ୍ କିଆୟାଆଜିମାରିଙ୍ଗ ବା ଖାନ୍ ଇୟାଝାଜା ଇର୍ହାମାର୍ହାନ୍ ।

୯ ଝେନେକା ଖାନ୍ ଇର୍ହାମାର୍ହାନ୍, “ଏ ମାପୁରୁ, ନାନ୍ନୁ ନି ଇଛା ପୁରା କିଦେଙ୍ଗ ତିଆର୍ ମାନା ।” ମାରି ମାପୁରୁ ଇୟାଝିନ୍ନୁ ପାଡ଼ିଇ ନିୟମ୍ ଡିସ୍‌ସି ତାନି ବାଦଲୁ କ୍ରିସ୍ତଦି ପୁନି ବଲିଦାନ୍ ଆସତି ।

୧୦ ଜିସୁ କ୍ରିସ୍ତ ଉନ୍‌ଡ୍ରୁଦେବା ମାତ୍ର ମାରି ଝିନ୍ନୁଦିନ୍‌ଡି ଉଣ୍ଡିଙ୍ଗ ନିଜେଦି ମେନ୍‌ଲ୍‌ଡିଙ୍ଗ ସିଜି ମାପୁରୁଦି ଇଛା ପୁରା କିତିମାନିଙ୍ଗ, ଖାନି ଆୟା ନିଜେଦିଙ୍ଗସିତି ଉଣ୍ଡିଙ୍ଗ ମାତ୍ର ଝିନ୍ନୁ ଲୋକୁ ପାପ୍‌ଦାନ୍ ନେଗେନ୍ ଆତିମାନିକା ।

୧୧ ଜିହୁଦି ଜାଜକର୍ ଝିନ୍ନୁଦିନ୍ ନିଜେଦି ପାଣି ପୁରାକିଜି ଆୟା ଉଣ୍ଡି ରକମତି ସେବା ଅର୍ସୁଦିଙ୍ଗଅର୍ସୁ କିଜିମାନାର୍, ମାତର୍ ଇୟାଝିନ୍ନୁ ବଲିଦାନ୍ ମାତ୍ରାନ୍ ଏସାଙ୍ଗବା ପାପ୍ କେମା ଆଦେଙ୍ଗ ଆଟ୍‌ଏଡ୍ ।

୧୨ ମାତର୍ କ୍ରିସ୍ତ ପାପ୍‌ତି ନିଜେଦିଙ୍ଗସିତି ଖାଜା ଝିନ୍ନୁଦିନ୍‌ଡି ଉଣ୍ଡିଙ୍ଗ ଉନ୍‌ଡ୍ରୁ ମାତ୍ର ବଲି ସିତାମାନାନ୍ । ତାନିଝେନେକା ଖାନ୍ ସଲସି ମାପୁରୁଦି ଉଣିକିୟୁ ତରିନ୍ ବାସ୍‌ତା ମାନାନ୍ ।

୧୩ ମାପୁରୁ ଖାନି ସାତୁରିଙ୍ଗ କାଲ୍‌କା ଆଡ଼ିଗି କିଇସାନ୍ତି ଖାନ ଆବେନ୍ କାପକିଜିନାନ୍ ।

୧୪ ଏମେକାର ପାପଦାନ୍ ନରାଜି ସୁତି ଆତାମାନା, ଆୟା ଉନ୍‌ଡ୍ରେମାତ୍ର ବଲିଦି ମାଡାନ୍ ଖାରିଙ୍ଗ ଖାନ ଖିଜୁଦିନ୍ତି ଉଣ୍ଡିଙ୍ଗ ପୁରା କିତାମାନାନ୍ ।

୧୫ ପବିତ୍ରଆମ୍ବା ବା ଖାନି ସାକ୍ୟ ସିଜି ଇର୍ହାମାନାଡ଼ :

୧୬ “ପ୍ରବୁ ଇଜିନାନ୍, ବବିସଡ଼ୁ ନାନୁ ଖାରି ଖାଲେ ଇୟା ପୁନି ନିୟମ୍ କିନା ।

ନାନୁ ନା ନିୟମ୍ ଖାରି ଜିବନ୍‌ଡୁ ଇତିନା

ମାରି ଖାରି ମନ୍‌ଡୁ ରାସ୍‌ନା ।”

୧୭ ମାରି ବା ଖାନ ଇଜିନାନ୍, “ନାନୁ ମାରି ଖାରି ପାପ୍ ନି ତାଗ୍‌ଇ ପାଣି ଏଡ଼ କିଏନି ।”

୧୮ ଆଦେଙ୍ଗ ଖାର ଜଦି କେମା ପୋଇତା ମାନାର୍, ଆରଡିଙ୍ଗ ପାପ୍ କେମା ଉଣ୍ଡିଙ୍ଗ ମାରି ବଲିଦାନ୍‌ଦି ଦରକାର୍ ସିଲେଡ଼ ।

ମାପୁରୁଦି ଲାକୁଡୁ ଆନାଟ୍

୧୯ ମାରି ଏ ତଡାନ୍‌କୁ ନି ତାଙ୍ଗ୍‌କ୍, ଜିସୁଦି ସାତି ମାଡାନ୍ ମାଡୁ ମହାପବିତ୍ର ବାଡିଡୁ ସୋନି ଉଣ୍ଡିଙ୍ଗ ପୁରା ଅଦିକାର୍ ପୋଇତିମାନିକା ।

୨୦ ଖାନ ଖାନି ମେନ୍‌ଲତିଖାଜା ପାରଦା ନାଣିମିରାନ୍ ମା ଉଣ୍ଡିଙ୍ଗ ଉଣ୍ଡି ପୁନି ଜିବନ୍‌ତି ସାରି ତରତାମାନାନ୍ ।

୨୧ ମାପୁରୁଦି ଇଲୁ ଇଲେଇ ମା ପେରିଜାଜକଦି ଅଦିକାର୍‌ତୁ ମାନାଡ଼ ।

୨୨ ମାରି ରାଦୁ, ମାଡୁ ନେଗି ମୋନ୍‌ତାନ୍ ମାରି ଆରୁଖା ବିସ୍‌ବାସତି ଖାଲେ ମାପୁରୁଦି ଲାକୁଡୁ ସୋନାଟ୍; ଇରିଙ୍ଗ ମାଡୁ ଇଲେଇ ତାଗ୍‌ଇ ବୁଦିଦାନ୍ କ୍ରସୁଦି ନେତେରତାନ୍ ନେଗେନ୍ ଆତିମାନିକା ମାରି ମା ମେନ୍‌ଲ ନେଗି ଏରୁଦାନ୍ ଇବାତି ମାନିକା ।

୨୩ ଏମେ ଆସା ମାଦି ମାନାଡ଼ ଇଜି ମାନାତିମାନିକା, ଆବେନ୍ ମାଡୁ ଡାଟ୍ ମାନିକା ମାନାଡ଼, ଇରିଙ୍ଗ ମାଡୁ ମାପୁରୁଦି ସିତିମାନିମାଟା ମୁସୁକୁ ଆସା ଇଟ୍‌ତିମାନିକା ।

୨୪ ରାତ୍ର, ମାତୁ ଆଇଝାରି ଉଣ୍ଡିଙ୍ଗ୍ ମୋନ୍‌ଦିୟାନ୍ ଆଜି ଝାରି ସୁବିଦା କିନାଟ୍; ଇୟାଝାଜା ଇସାବ୍‌ତାନ୍ ଜିବନ୍‌ନୋନିକା ସିଜି ସଡ଼ପାଣି କିନାଟ୍ ।

୨୫ ମାରି ଏନ୍ ଏନ୍ ଏଣ୍ଡେସ୍ ପାରତନାତୁ ସୋନ୍‌ଡ୍ରେଙ୍ଗ୍ ଏଲା କିନାଟ୍, ମାତୁ ଆୟାଝାଜା କିଏଟ୍ । ମାରି ପ୍ରବୁଦି ଦିନ୍ ଲାକୁତୁ ଆଜି ଝାଜିନାଟ୍ ନେସ୍‌ସି ନିଜେନିଜେଦିଙ୍ଗ୍ ନାଣ୍ଡୁ ଝେଡ଼ିକା କିନିକା ମାନାଟ୍ ।

୨୬ ମା ଲାକୁତୁ ସଡ଼ ନେସ୍‌ତି ଝେନେକା ମାତୁ ଜଦି ନେସ୍‌ସି ନେସ୍‌ସି ପାପୁତୁ ମାନିକା, ଆରତିଙ୍ଗ୍ ମାରି ଇନି ବଲିଦାନ୍ ମାଙ୍ଗ୍ ପାପୁତାନ୍ ମୁକୁଡ଼ା କିଦେଙ୍ଗ୍ ଆଟ୍‌ଏଡ଼ ।

୨୭ ଆରତିଙ୍ଗ୍, ମାତୁ ଝାଜିମାନି ପେରି ବିଚାରୁତୁ ସାମାନ୍ ଆଜି ମାପୁରୁଦି ବିରୁଦ୍‌କିନିଝାରି ଉଣ୍ଡିଙ୍ଗ୍ ନାଣ୍ଡୁକାସ୍‌ସିମାନି ସିସୁଦୁ ଦଂସ୍ ପୋଇନି ଇସାପୁତି ତିଲାନି ବାଦ୍‌ଲୁ ମା ଆଇ ଇନି ଉପାୟ୍ ସିଲେଡ଼ ।

୨୮ ଏନ୍ ଜଦି ମୋସାଦି ନିୟମ୍ ଅମାନ୍‌ୟ କିନାନ୍ ମାରି ଅରେନ୍ ସିଲେଡିଙ୍ଗ୍ ନାଣ୍ଡୁଲୋକା ସାକିରି ସାକ୍ୟଦି ମାଡ଼ାନ୍ ଝାନ୍ ଦୋସି ଆନାନ୍, ଆରତିଙ୍ଗ୍ ଝାନିଙ୍ଗ୍ ଦୟା କିଏଣ୍‌ଗା ସାନି ଦଣ୍ଡୁ ସିନାଟ୍ ।

୨୯ ଆରତିଙ୍ଗ୍, ଏନ୍ ମାପୁରୁଦି ମାରିନ୍‌ଡିଙ୍ଗ୍ ଅମାନ୍‌ୟ କିନାନ୍, ମାପୁରୁଦି ପୁନି ନିୟମ୍‌ତି ନେଡେରତି ମାଡ଼ାନ୍ ପାପ୍ କେମାଦି ସୁଜୋଗ୍ ପୋଇତିମାରିଙ୍ଗ୍ ବା ଝାନିଙ୍ଗ୍ କାଡ଼ିଜିନାନ୍ ମାରି ଅନୁଗ୍ରହଦି ପବିତ୍ରଆମ୍‌ଦିଙ୍ଗ୍ ଅପମାନ୍ କିନାନ୍, ଝାନି ଦସ୍ ଇନିକା ଆଏଡ଼ ? ଅଡ଼ବିଜ ସୁଡ଼ୁ, ଝାନ୍ ଏସୋ ନାଣ୍ଡୁ ଦଣ୍ଡୁପୋଇନାନ୍ ।

୩୦ “ନାନ୍ ପ୍ରତିସଦ୍ ଅନା, ନାନ୍ ଦଣ୍ଡୁସିନିକିୟା ।” ଇୟା ମାଟା ଜେ ଇର୍ହାମାନାନ୍, ଝାନିଙ୍ଗ୍ ମାପ୍ ନେସ୍‌ନାପ୍ । ଝାନ୍ ମାରିବା ଇର୍ହାମାନାନ୍, “ପ୍ରବୁ ଝାନି ଲୋକାଙ୍ଗ୍ ବିଚାରକିନାନ୍ ।”

୩୧ ଜିବନ୍‌ମାନି ମାପୁରୁଦି ବିସାରତି ଆଗ୍‌ଡିନିନିକା ଏସୋ ତିଲାନିକା ।

୩୨ ମି ଆଗ୍‌ଡିରି ମାଟା ଅଡ଼ବିଦୁ । ମାପୁରୁଦି ଜାୟ୍ ମିଙ୍ଗ୍ ନାଣ୍ଡୁଜାୟ୍ କିତି ଝେନେକା ମିର୍ ଆଇ ଆଇ ଦୁଃକ୍ କାସ୍ ପୋଇତିଦେର୍, ମାଡର୍ ଆରାଏତି ମାର୍‌ଇଦେର୍ ।

୩୩ ଏସାଙ୍ଗ୍ ଏସାଙ୍ଗ୍ ମିର୍ ଝିଜୁଲୋକାମାନ୍ ନିଦା ମାରି ମାଡ଼ତିନ୍‌ଜି ମାହ୍‌ଦେର୍ । ମାରି ଏସାଙ୍ଗ୍ ଏସାଙ୍ଗ୍ ମିର୍ ଆଇଝାରି ଦୁଃକ୍ କାସ୍‌ଦୁ

ଦୋଷଆଦେଙ୍ଗ ତିଆର ମାହ ଦେର ।

୩୪ ମିର ଜଇଲ୍‌ହୁମାନି ଲୋକା ଦୁଃଖ କାକୁତ ଦି ସାକା
କିଜିମାରଇଦେର ମାରି ଏସ୍ତିଝାଲେ ମି ଝିଜୁ ତଥାଁ ଆତାଡ଼,
ନାସ୍ତିଝାଲେ ମିର ଝେଡ଼ିକାଦାନ ଝିଜୁ କାସ୍ତୁ ସାସ୍ କିତିଦେର, ଇରିଙ୍ଗ
ମିଦି ଜେ ପେରିକା ଝିଜୁଦିନ୍ତି ଦନ୍‌ସମ୍ପତି ମାନାଡ଼, ଆକା ମିର
ନେସ୍ତିମାରିଇଦେର ।

୩୫ ଆଦେଙ୍ଗ ସାହାସ୍ ଆରାକିମାଟ୍, ଇରିଙ୍ଗ ସଡ଼ ସାହାସ୍ତି ପେରି
ପୁରସ୍ତାର ମାନାଡ଼ ।

୩୬ ମାପୁରୁଦି ବଦା ପୁରା କିଜି, ଏମେକା ଝାନ ସିନାନ ଇଜି
ପାରମାଣ୍ କିତାମାନାନ୍, ଆକା ପୋଇନି ଆସାଦିଙ୍ଗ ସାସ୍ ଆସ୍‌ସି
ମାଡୁରୁ ।

୩୭ ଦାମ୍‌ସାସ୍ତୁ ରାସାତାମାନାଡ଼ :

“ମାରି ଅଡ଼ପ୍ ସାଣେକ୍ କାପ୍‌କିଦୁ,
ଏମେଝାନି ଝାନିକା ମାନାଡ଼, ଝାନ ଝାନାନ୍,
ଝେଡ଼ା କିଏନ୍,

୩୮ ନା ଦାମ୍‌ଦି ଲୋକୁ ବିସ୍‌ବାସ୍‌ତାନ ଆରୁଝା ତେବାଜି ଜିନାର୍,
ମାତର ଏନ୍ ଜଦି ଝେନ୍‌କା ଗୁସାନାନ୍,
ଝାନି ଉଣ୍ଡିଙ୍ଗ ନାନୁ ଝେଡ଼ିକା ଆଦେଙ୍ଗ୍ ଆଟ୍‌ଏ ।”

୩୯ ଝେନ୍‌କା ସଲସି ନାସ୍ତୁ ଆନି ଲୋକୁ ମାପୁ ଆଏପ୍ । ମାପୁ ଆରୁଝା
ବିସ୍‌ବାସ୍ ମାରି ପରିତ୍ରାଣ୍ ପୋଇତାମାନାପ୍ ।

୧୧

ବିସ୍‌ବାସ୍

୧ ଆସା କିନି ବିସ୍‌ୟ ପୋଇନିକା ପୁରା ନେସ୍‌ନାଟ୍ ମାରି ତରଇ
ବିସ୍‌ୟତି ସଡ଼ବୁଦି ଆସାନିକା ନେ ବିସ୍‌ବାସ୍ ।

୨ ପୁର୍ବେଦି ଲୋକୁ ଝାରି ବିସ୍‌ବାସ୍‌ଦାନ ମାପୁରୁଦି ଝେଡ଼ିକାଦିଲୋକୁ
ଆତାମାର୍ହାର ।

୩ ☆ ମାପୁରୁଦି ବାକ୍ୟଦାନ ସାରା ଦୁନିଆ ତିଆର ଆତାତ୍ ମାରି ସୁଡ଼ିଇ ବିସୟଦାନ ସୁଣି ବିସୟତି ତିଆର ଆତାତ୍, ଇୟା ମାଟା ବିସ୍ବାସତାନ ମାତୁ ନେସସିନିକା ।

୪ ବିସ୍ବାସତାନ ହେବଲ ମାପୁରୁଦି ଲାକ୍ତୁ କୟିନଦି ବାଦ୍ଲୁ ନେଗି ପୁଜା କିତାମାର୍ହାନ । ନିଜେଦି ବିସ୍ବାସଦାନ ଝାନ୍ ମାପୁରୁଦି ମାଡାନ ଦାର୍ମୁଦିକାନ ଇଜି ସାକ୍ୟ ପୋଇତାନ, ଇରିଙ୍ ମାପୁରୁ ନିଜେ ଝାନି ସିତିମାନିପୁଜା ମାନାତାମାରାନ । ଝାନି ବିସ୍ବାସ ଉଣ୍ଡିଙ୍ ହେବଲ ସାତିସରିଙ୍ ବା ଇୟାସାନ୍ଦି ଝାରିଗିନାନ ।

୫ ବିସ୍ବାସତାନ ହନୋକ ସାନି ମାଡାନକୁ ରକିୟା ପୋଇତାମାରାନ । ମାପୁରୁ ଝାନିଙ୍ ନିଜେ ଲାକ୍ତୁ ଅତାମାରାନ ମାରି ଝାନିଙ୍ ଏନ୍ ମାରି ସୁଡ଼ୁଦେଙ୍ ଆଟ୍‌ଏତାମାର୍ହାର୍ । ଦର୍ମସାସ୍ତ୍ରୁ ରାସାତାମାନାତ୍ ଜେ, ହନୋକ ମାପୁରୁଦି ଲାକ୍ତୁ ସନି ଆଗଡ଼ି ଝାନି ଝେଡ଼ିକାଦିକାନ ଆତାମାର୍ହାନ ।

୬ ବିସ୍ବାସତିଙ୍ ତିସତିଙ୍ ଏନ୍ ମାପୁରୁଙ୍ ଝେଡ଼ିକା କିଦେଙ୍ ଆଟ୍‌ଏନ୍, ଇରିଙ୍ ଏନ୍ ମାପୁରୁଦି ଲାକ୍ତୁ ଝାନାନ, ଝାନ୍ ମାପୁରୁଦିମାନୁ ବିସ୍ବାସ କିନିକା ଦରକାର୍, ମାପୁରୁ ଜେ ଝାନି ଝେନ୍‌କାସନିଝାରିଙ୍ ଆସା ପୁରା କିନାନ, ଆକାବା ବିସ୍ବାସ କିନିକା ଦରକାର୍ ।

୭ ବିସ୍ବାସତି ସାକ୍ତିଦାନ ନୋହ ଇନିକା ଅଡ଼ବିଏଶଗା ଗଟ୍‌ନା ବିସୟତାନ ମାପୁରୁଦି ଜାଗରାତାଦି ବାକ୍ୟ ଝେନ୍‌ଡ୍ରେଙ୍ ଆଟ୍‌ତାମାର୍‌ଆନ୍ । ଝାନ୍ ମାପୁରୁଦି ଆଦେସ୍ ମାନାଜି ଉଡ଼ି ଜାହାଜ୍ ତିଆର କିତାନ । ଆବେନ୍ ଝାନ୍ ମାରି ଝାନି ଇଲୁଦିଲୋକ୍ ଝିଜୁ ରକ୍‌ୟା ପୋଇତାର୍ । ତାନିବାଦ୍ଲୁ ଦେସ୍‌ତିଲୋକ୍ ଦଣ୍ଡ ଆତାର୍, ମାତର୍ ନୋହ ଝାନି ବିସ୍ବାସ ଉଣ୍ଡିଙ୍ ଦାର୍ମୁଦି ପୁରସ୍କାର୍ ପୋଇତାର୍ ।

୮ ମାପୁରୁ ଅବ୍ରାହାମଦିଙ୍ ଏମେ ଦେସ୍ ସିନା ଇଜି ମାଟା ସିତାମାରାନ, ଆୟା ଦେସ୍‌ତୁ ସୋନି ଉଣ୍ଡିଙ୍ ଝାନ୍ ଏସ୍ତ୍ରିଝାଲେ ଝାନିଙ୍ କୁକ୍‌ତାନ, ନାସ୍ତ୍ରିଝାଲେ ଅବ୍ରାହାମ ବିସ୍ବାସତାନ ମାପୁରୁଦି

ମାଟା ମାନାତା ମାର୍ହାନ୍ । ଖାନ୍ ଏମେମାନୁ ସୋନାନ୍, ଆକା ନେସ୍‌ଏଜି ବା ନିଜେଦି ଦେସ୍ ଡିସ୍‌ତା ସର୍ହାନ୍ ।

୯୮ ଖାନ୍ ବିସ୍‌ବାସ୍‌ତୁ ମାପୁରୁଦି ସିତିମାନି ଦେସ୍‌ତୁ ଆଇଦେସ୍‌ତିକାନ୍ ଖାଜା ବାସା କିତାନ୍ । ଖାନ୍ ଗୁଡ଼ାତୁ ବାସା କିତାନ୍ ମାରି ଖାନି ଖାଜା ମାପୁରୁଦିମାଡ଼ାନ୍ ପାର୍‌ମାଣ୍ ଆଜି ଇସ୍‌ହାକ୍ ନି ଜାକୁବ ବା ଆୟାଖାଜା ଗୁଡ଼ାତୁ ବାସା କିତାମାର୍ହାନ୍ ।

୯୯ ଏମେ ଖିଜୁଦିନତି ଗାଡ଼୍ ମାପୁରୁଦି ମାଡ଼ାନ୍ ରସ୍‌ତିକାନ୍ ନି ତିଆରକିତିକାନ୍, ଅବ୍ରାହାମ ଆୟା ଗାଡ଼ତିଙ୍ଗ୍ କାପ୍‌କିଜି ମାରାନ୍ ।

୧୦୦ ଜଦିବା ସାରା କଡ଼ର୍‌ଆଇଲି ଆନିକା ସିଲେତାଡ଼୍, ବିସ୍‌ବାସ୍‌ତି ସାଲ୍ଲିଦାନ୍ ଅବ୍ରାହାମ ତକ୍ରା ବୟସ୍‌ତୁ ବା ବୁବା ଆଦେଙ୍ଗ୍ ଆବ୍‌ତା ମାର୍ହାନ୍ । ମାପୁରୁ ଖାନି ମାଟା ରକିୟା କିନାନ୍ ଇଜି ଅବ୍ରାହାମତି ବିସ୍‌ବାସ୍ ମାରାଡ଼୍ ।

୧୦୧ ଅବ୍ରାହାମ ସାନି ଖାଜା ଆତିମାରିଙ୍ଗ୍ ବା ଖାନିମାଡ଼ାନ୍‌କୁ ବାଦଡ଼ଦି ସୁକେଙ୍ଗ୍ ମାରି ସାମ୍‌ତୁରୁତି ବାଲି ଖାଜା ଲେକିସ୍‌ତେଙ୍ଗ୍ ଆବ୍‌ଇ କୁରୁମ୍ ଜନମ୍ ଆତାର୍ ।

୧୦୨ ଇୟାଖିଜୁ ଲୋକୁ ନିଜେଦି ବିସ୍‌ବାସ୍‌ତୁ ଆଟୁଖା ତେବାଜି ସାତାସର୍ହାନ୍ । ମାପୁରୁ ପାର୍‌ମାଣ୍ କିତିମାନି ବିସ୍‌ୟାଖିଜୁ ଖାର୍ ପୋଇଦେଙ୍ଗ୍ ଆବ୍‌ଏତିଙ୍ଗ୍ ବା ଆକରାନ୍ ଆକା ସୁଡ଼ିଜି କୁକ୍‌ନିକା କିତାମାର୍ହାନ୍ ମାରି ଇୟା ଜଗଡ଼୍‌ତୁ ଖାର୍ କେବଲ ଆଇଦେସ୍‌ତିକାର୍ ମାରି ଆଇମାନୁବାସାନିକାର୍ ଇଜି ମାନାତା ମାର୍ହାନ୍ ।

୧୦୩ ଏମେକାର୍ ଇୟାଖାଜା ମାଟା ଇନାର୍, ଖାର୍ ମାରି ଉଣ୍ଡି ନିଜେଦିବୁମିଦିଙ୍ଗ୍ ପୋଇଜିନାର୍ ଇଜି ନେସ୍‌ତେଙ୍ଗ୍ ଆନାଡ଼୍ ।

୧୦୪ ଖାର୍ ଏମେ ଦେସ୍ ଡିସ୍‌ତା ଖାତାର୍‌ମାରାର୍, ଆୟା ଦେସ୍‌ତିଙ୍ଗ୍ ମାରି ଏଡ଼୍ କିଏଜି ମାର୍ହାନ୍ । ଜଦି ଏଡ଼୍ କିତାର୍‌ମାନ୍, ଆରତିଙ୍ଗ୍ ଆବେନ୍ ଖାର୍ ଡେସି ସନ୍‌ଡ୍ରେଙ୍ଗ୍ ସୁଜୋଗ୍ ପୋଇତାର୍‌ମାନ୍ ।

୧୦୫ ମାତର୍ ଖାର୍ ଉନ୍‌ଡ୍ରି ନେଗି ଦେସ୍‌ତୁ, ଅର୍ତ୍ତାଡ଼୍ ମୁସ୍‌କୁପୁରତି ଦେସ୍‌ତୁ ସନି ଉଣ୍ଡିଙ୍ଗ୍ ବଦା କିଜିମାରାର୍ । ଆଦେଙ୍ଗ୍ ଖାର୍ ମାପୁରୁଙ୍ଗ୍ ନିଜେଦି ମାପୁରୁ ଇଜି ମାନାଜିନି ମାଡ଼ାନ୍ ଖାନ୍ ସେମାର୍ ଆଏନ୍ ମାର୍ହାନ୍ । ମାପୁରୁ ଖାରି ଉଣ୍ଡିଙ୍ଗ୍ ଉନ୍‌ଡ୍ରି ଗାଡ଼୍ ତିଆର କିଜି ଇବ୍‌ତାମାନାନ୍ ।

୧୭ ମାପୁରୁ ଅବ୍ରାହାମଟି ବିସ୍ବାସ ପରିକା କିନିଖାଲେ ଅବ୍ରାହାମ ନିଜେ ମାରିନ୍ ଇସହାକଟିଙ୍କ ପୁଜାଖାଜା ସିଦେଙ୍କ ତିଆର୍ ଆତାନ୍ । ମାପୁରୁ ଅବ୍ରାହାମଟିଙ୍କ ନେ ଖାନି ପାରମାଣ୍ ମାଟା ସିତାମାର୍ହାନ୍, ମାରିବା ଅବ୍ରାହାମ ନିଜେଦି ଅରେନ୍ ମାରିନ୍ତିଙ୍କ ପୁଜାଖାଜା ସିଦେଙ୍କ ତିଆର୍ ଆତାନ୍ ।

୧୮ ମାପୁରୁ ଖାନିଙ୍କ ଇର୍ହାମାରାନ୍, “ନାନ୍ ନିଙ୍ଗ” ଏମେ କୁଟୁମ୍ ସିନା ଇଜି ମାଟା ସିତାମାନାନ୍, ଆକା ଇସହାକଦି ମାଡାନ୍ ନେ ଜନମ୍ ଆନାର ।”

୧୯ ମାପୁରୁ ଜେ ଇସହାକଟିଙ୍କ ସାତିମାଡାନ୍ ଜିବନ୍ କିଦେଙ୍କ ଆଟ୍ଟନାନ୍, ଇୟା ବିସ୍ବାସ ଅବ୍ରାହାମଦି ମାରାଡ୍ । ସଡ୍ତାନ, ଅବ୍ରାହାମ ଇସହାକ ସାତିମାଡାନ୍ ଡେସି ଜିବନ୍ ପୋଇତାମାନାନ୍ ଇଜି କାତାଦି ଖାଜା ଖେରତିଙ୍କ ଇକା ବୁଲ୍ ଆଏଡ୍ ।

୨୦ ଇସହାକ ନିଜେଦି ବିସ୍ବାସତି ବପୁଦାନ୍ ଜାକୁବ ମାରି ଏସୌଦି ଅଡ୍ବିଜି ନେଗିତାନି ଉଣ୍ଡିଙ୍କ ଆସିର୍ବାଦ୍ କିତାନ୍ ।

୨୧ ବିସ୍ବାସତାନ୍ ନେ ଜାକୁବ ସାନି ପୁର୍ବେ ଜୋସେପ୍ତି ରିଏରି ମାରିସିରିଙ୍କ ଆସିର୍ବାଦ୍ କିତାମାରାନ୍ । ଖାନ୍ ନିଜେଦି ବାଡିଗାଦି ଆଡ୍ଗି ପାଡ୍ଗିଜି ମାପୁରୁଦି ପାର୍ତନା କିତାମାର୍ହାନ୍ ।

୨୨ ଜୋସେପ୍ ସାନି ଖାଲେ ଖାନି ବିସ୍ବାସତି ବପୁଦାନ୍ ଇସ୍ରାଏଲ୍ ଲୋକାଦି ମିସର ଦେସତାନ୍ ସରଇ ବବିସଡ୍ ମାଟା ଇର୍ହାମାର୍ହାନ୍ ମାରି ଖାନି ମାଡା ଏଣ୍ଡେସ୍ ନେଗେନ୍ ପୋକ୍ନାର୍, ଆୟାଉଣ୍ଡିଙ୍କ ଆଦେସ୍ ଖେରତାମାରାନ୍ ।

୨୩ ବିସ୍ବାସତାନ୍ ମୋସାଦି ବୁବା ଯାୟା ଖାନିଙ୍କ ଜନମ୍ତାନ୍ ମୁଡ୍ରି ଲେଜୁକୁ ସାନ୍ଦି ଆଡାକ୍ତା ଇର୍ତାମାରାର୍ । ଇସ୍ରା କଡ୍ଡଦିଙ୍କ୍ ସୁନ୍ଦର୍ ସୁଡ୍ଡିଜି ଖାର ରାଜେଙ୍କ୍ ବା ଅମାନ୍ୟ କିଦେଙ୍କ୍ ତିଲାଏଜି ମାର୍ହାନ୍ ।

୨୪ ମୋସା ବୟସ୍ ଆତି ଖେନ୍କା ବିସ୍ବାସତି ବପୁଦାନ୍ ରାଜାଦି ଗାଡ୍ସିଦି ମାରିନ୍ ଇଜି ପରିତୟ ଆଦେଙ୍କ୍ ମନା କିତାନ୍ ।

୨୫ ପାପୁଡୁ ଡେବାଜି ଏସ୍ ବେଡା ଜିବନ୍ ଜିନି ବାଦ୍ଲୁ ମାପୁରୁଦି ଲୋକା ଖାଲେ ଦୁଃକ୍ବୋଗ୍ କିଦେଙ୍କ୍ ଖାନ୍ ବଦାକିତା ମାର୍ହାନ୍ ।

୨୭ ଖାନ୍ ମିସର ଦେସ୍ତି ଝିନ୍ଦୁ ଦନ୍ ବାଦଲୁ ମସିହଦି ଉଣ୍ଡିଙ୍ଗ କାଡ଼ାୟଆନିକା ନେଗେଡ଼ ଇଜି ଏଡ଼କିତାନ୍, ଇରିଙ୍ଗ ଖାନ୍ ପୁରସ୍ତାବ୍ତି ଉଣ୍ଡିଙ୍ଗ ଖାନ୍ ଆସା ମାରାଡ଼ ।

୨୮ ବିସ୍ବାସ୍ତାନ୍ ମୋସା ରାଜାଦି ରିସାଦିଙ୍ଗ ତିଲାଏଜି ମିସର୍ ଦେସ୍ ଡିସ୍ତା ସର୍ହାନ୍; ସତେ ଏଣ୍ଡେସ୍ ଖାନ୍ ସୁଡ଼ଛୁ ମାପୁରୁଙ୍ଗୁ ସୁଡ଼ିଜିମାରାନ୍; ଆଦେଙ୍ଗୁ ଡେସି ସଲ୍‌ଏଣ୍ଗା କେଏତା ମାର୍ହାନ୍ ।

୨୯ ବିସ୍ବାସ୍ତାନ୍ ଖାନ୍ ନିସ୍ତାର ପଣ୍ଡୟ କିତାମାର୍ହାନ୍ ମାରି ଜୁଦ୍‌କିନି ଦୁଡ଼ ଏଣ୍ଡେସ୍ ଇସ୍ରାଏଲ ଲୋକାରି ପେରିମାରିନତିଙ୍ଗ ସାପସ୍ କିଏଡ଼, ଇୟାଉଣ୍ଡିଙ୍ଗ ଦୁଝାରବନ୍ଦୁ ନେତେର୍ ସିଲେକ୍‌ତେଙ୍ଗ ଆଦେସ୍ ସିତାମାରାନ୍ ।

୩୦ ବିସ୍ବାସ୍ତାନ୍ ଇସ୍ରାଏଲଦି ଲୋକୁ ଖାରିତି ବୁମି ମୁସୁକୁ ବୁଲାତି ଖାଜା ସୁଫ୍ ସାମ୍‌ଦୁରୁ ଲୋଇ ସିଜି ନାତାର୍; ମାତର୍ ମିସର୍‌ତିକାର୍ ଆୟାଖାଜା ନାତେଙ୍ଗ ସେସ୍ଟା କିଦେଙ୍ଗ ସଲ୍‌ସି ମୁଡ଼ିଗିଜି ସାତାସର୍ହାର୍ ।

୩୧ ଇସ୍ରାଏଲତିଲୋକୁ ଜିରିହୋ ଗାଡ଼୍ତି ବାଉଡ଼ି ଗତା ସାରିବେଡ଼ିତି ବିସ୍ବାସ୍ତାନ୍ ସାଡ଼ ଦିନ୍ ବୁଲାତି ଝେନେକା, ଆକା ଦଂସ ଆତାମାର୍ହାଡ଼ ।

୩୨ ଦାରିପାଣିକିନି ରାହାବ ତାନି ବିସ୍ବାସ୍ତି ଉଣ୍ଡିଙ୍ଗ ଇସ୍ରାଏଲତି ଡଙ୍ଗାରିଙ୍ଗ ବାଡ଼ି ସିତାଡ଼ ମାରି ମାପୁରୁଦି ବିରୁଦ୍‌କିନି ଲୋକା ଖାଲେ ସାଏଣ୍ଗା ରକ୍ଷା ପୋଇତା ମାର୍ହାଡ଼ ।

୩୩ ନାନ୍ ମାରି ଏସୋ ମାଟେଙ୍ଗ ବର୍ଣ୍ଣନାକିଜି ଝେର୍‌ନା ? ଗିଦିୟୋନ, ବାରାକ, ଶାମ୍‌ଗୋନ୍, ଯିପ୍ରାହ, ଦାଉଦ, ସାମୁଏଲ୍ ମାରି ବାବବାଦିରି ବିସ୍ତାନ୍ ଝେର୍‌ତେଙ୍ଗ ସରିଙ୍ଗୁ ବେଡ଼ା ସିଲେଡ଼ ।

୩୪ ବିସ୍ବାସ୍ତାନ୍ ଇୟାକାର୍ ଆଇଆଇ ଦେସ୍ ବିରୁଦ୍‌ତାନ୍ ଜୁଦ୍ କିଜି ଜିଶାତା ମାର୍ହାର୍ । ଇୟାକାର୍ ଦାମ୍‌ ପାଣି ପୁରା କିତାର୍, ମାପୁରୁ ପାର୍‌ମାଣ୍ କିତିମାନି ବିସ୍ତାନ୍‌କୁଝିଜୁ ପୋଇତାର୍; ପାର୍ଗାନରେସ୍ ଝେୟୁ କେରେପ୍‌ତାର୍,

୩୫ ସିସୁ ନାପ୍‌ତାର୍ ମାରି କାଣ୍ଡା ଦାରାଦାନ୍ ରକିୟା ପୋଇତାର୍ । ଇୟାକାର୍ ସାକ୍ତିସିଲେତାଡ଼, ମାତର୍ ସାକ୍ତି ଆତାର୍; ଜୁଦ୍‌ଦୁ ଜିଶାତାର୍, ମାରି ଆଇଦେସ୍ତି ସାଡ଼ୁ ସନ୍‌ସରିଙ୍ଗ ଆରା କିତାର୍ ।

୩୫ ବିସ୍ବାସ୍ତାନ୍ ଆଇମେକ୍ ତାମେକା ସାତି ନିଜେଦି ଲୋକାଙ୍ଗ୍ ଜିବନ୍ମାନି ଅବସ୍ଥାଦାନ୍ ମାରିଡେସି ପୋଇତେ ।

ଆଇକାର୍ ଉଣ୍ଟି ନେଗି ଜିବନ୍ ପୋଇନି ଉଣ୍ଟି ରକିୟା ପୋୟଦେଙ୍ଗ୍ ବଦା କିଏଣ୍ଗା କାସ୍ତାନ୍ ସାତେ ସର୍ହେ ।

୩୬ ଏନ୍ ଏନ୍ କାସ୍ତା ସାସ୍ତିକାର୍, କରତାମାଡ୍ ପୋଇତାର୍ ମାରି ସିକିଡିଦାନ୍ ତୋରାଜି ଜଇଲ୍ ଦଣ୍ଡ ପୋଇତାର୍ ।

୩୭ ଖାର୍ କାଲୁକାଣ୍ଡୁକୁ ଡାକ୍ତିଙ୍ଗ୍ ସାତାର୍, କରତ୍ତଦାନ୍ ରୁଣ୍ଡି ମକେଙ୍ଗ୍ ଆତାର୍ ମାରି କାଣ୍ଡାଦାନ୍ ସାତାର୍ । ଏନ୍ ଏନ୍ ମେଣ୍ଡା ନି ଗରିଆ ତୋଲୁ ଆରାଜି କାକୁତ୍ ଆତାର୍, କାସ୍ତା ନି ତାଡ୍ନା ଆଜି ଆୟାଞ୍ଜା ବୁଲାତାର୍ ।

୩୮ ଇୟାଞ୍ଜା ଲୋକା ଉଣ୍ଟି ଦୁନିଆଦୁ ନେଗି ବାଡି ସିଲେତାଡ୍ । ଖାର୍ ବୁଲାନିକାର୍ ଞ୍ଜା ବାଲିବୁମିଦୁ ମାରି ଗରନ୍ତୁ ବୁଲାତାର୍, ସାରେଙ୍ଗ୍ ନି ବୁମିଦିଗୁଟେଆଙ୍ଗ୍ ବାସାକିତାର୍ ।

୩୯ ଇୟା ଝିଜେରେ ନିଜେ ନିଜେଦି ବିସ୍ବାସ୍ତାନ୍ ଏସ ସିନା ଇଟ୍ତା ସର୍ହା ମାନାର୍ । ମାରିବା ଖାର୍ ମାପୁରୁଦି ସିନି ବିସୟ୍ ପୋଇଏତାମାରାର୍,

୪୦ ଇରିଙ୍ଗ୍ ମାପୁରୁ ମା ଉଣ୍ଟି ଉନ୍ତୁ ନେଗି ଜଜନା କିତାମାର୍ହାନ୍ । ଖାର୍ ମା ଞ୍ଜାଲେ ଏଣ୍ଡେସ୍ ପୁରା ଆନାର୍, ଇକାନେ ମାପୁରୁଦି ବଦା ମାରାଡ୍ ।

୧୨

ମାପୁରୁ ମା ବୁବା

୧ ଇୟାଞ୍ଜା ସାକିଲୋକାରି ଉଣ୍ଟି ପେରି ଦଲ୍ ମା ସାରିବେଡିତି କେରୁବିତାମାନାର୍ । ମାରି ରାଦୁ, ଏମେ ଝିଜୁ ବିସୟ୍ ମାଙ୍ଗ୍ ବାଦା କିଜିନାଡ୍ ମାରି ଏମେ ଝିଜୁ ପାପ୍ ମାଙ୍ଗ୍ ରେଲ୍ଜି ଆସିନାଡ୍, ଝିଜୁ ଡିସ୍ସି ଆରୁଞ୍ଜା ଆଜି ମା ଉଣ୍ଟି ତିଆର୍ଆତିମାନି ସାରିଦୁ ଉରୁକସି ଆଗଡି ସନାଡ୍ ।

୨ ଏମେଞ୍ଜି ମୁସୁକୁ ମା ଟିକ୍ ବିସ୍ବାସ୍ ଆସା କିଜିନିକା, ଆୟା ଜିସୁଦି ଉଣ୍ଟିଙ୍ଗ୍ ମା କାଣ୍ଡୁକୁ ନେଗିକା ଇଡିନିକା । ଞ୍ଜାନ୍ କୁସଦି ତିଲାଜି ନିଜେ ପାଣିଦାନ୍ ତେବାଏନ୍ ମାର୍ହାନ୍; ମାତର୍ ଞ୍ଜାନିଦିନ୍ତୁ ଞ୍ଜାନି ଉଣ୍ଟିଙ୍ଗ୍

ଉଣ୍ଡାତିମାନି ଖେଡ଼ିକା ଉଣ୍ଡିଙ୍ଗ, କୁସକାର୍ଦ୍ଦି ସାତିମାନି ଅପମାନତିଙ୍ଗ
 ଝାନ୍ ମାନାଏନ୍‌ଣା ବୁଦି କିତାନ୍; ଇଲେଇ ଝାନ୍ ମାପୁରୁଦି ରାଜାଗାଦିଦି
 ଉଣିକିନ୍ନୁ ତରିନ୍ ବାସ୍ତାମାନାନ୍ ।

୩ ଅଡ଼ବିଜ ସୁଡ଼ୁ, ଝାନ୍ ଏସୋ ଦୁଃକ୍ ପୋଇତାମାନାନ୍ । ଝାନ୍
 ପାପି ଲୋକାମାଡ଼ାନ୍ ଏସୋ ନିଦା ପୋଇଏତାମାନାନ୍ । ଆଦେଙ୍ଗ୍
 ମିର୍ ମନ୍‌ଉଣା କିଜି ନିରାସ୍ ଆମାଟ୍ ।

୪ ଇରିଙ୍ଗ୍ ମିଙ୍ଗ୍ ଇୟାସାନ୍ ପାପ୍ ବିରୁଦ୍‌ତାନ୍ ସାନିନାନି ଜୁଦ୍
 କିଦେଙ୍ଗ୍ ପୋଡ଼ାଏଡ଼ ।

୫ ମାପୁରୁ ଝାନ୍ ମାରିନ୍ ଝାଜା ମିଙ୍ଗ୍ ଏମେ ଖେଡ଼ିକା କାରୁର୍
 ଝେନିସ୍ତା ମାନାର୍, ଆକା ଇନିକା ମିର୍ ବାଣାଜିନିଦେର୍ ?

“ଏ ନା ମାରିନ୍, ମାପୁରୁ ମିଙ୍ଗ୍ ସାସନ୍ କିନିଝାଲେ ମୋନଦିୟାନ୍ ସିଦୁ
 ।

ଝାନ୍ ମିଙ୍ଗ୍ ଲାଗାନିଝାଲେ ମନ୍‌ଉଣା କିମାଟ୍ ।

୬ ଇରିଙ୍ଗ୍ ମାପୁରୁ ଏମେଝାନିଙ୍ଗ୍ ଜିବନ୍‌ନୋନାନ୍, ଝାନିଙ୍ଗ୍ ସାସନ୍
 କିନାନ୍

ମାରି ଏମେଝାନିଙ୍ଗ୍ ମାରିନ୍ ଇଜି ମାନାନାନ୍, ଝାନିଙ୍ଗ୍ ସାସ୍ତି
 ସିନାନ୍ ।”

୭ ମି ଦୁଃକ୍ କାସୁଦିଙ୍ଗ୍ ବୁବାଦି ସାସନ୍ ଇଜି ଅଡ଼ବିଜି ସାସ୍ ଆସ୍ତୁ,
 ତେନିମାଡ଼ାନ୍ ମାପୁରୁ ମି ଝାଲେ ମାରିନ୍ ଝାଜା ବ୍ୟବହାର୍ କିଜିନାନ୍
 ଇଜି ଝେଙ୍ଗ୍ ଜିନାଡ଼ । ଇରିଙ୍ଗ୍ ବୁବା ଆମାଝାନିଙ୍ଗ୍ ସାସନ୍ କିଏନ୍,
 ଇୟାଝାଜା ମାରିନ୍ ଏନ୍ ମାନାନ୍ ?

୮ ଝାରି ଆଇ ମାରିସିର୍ ଝାଜା ନିଙ୍ଗ୍ ଜଦି ମି ବୁବା ମିସା କିଏନ୍,
 ଆରଡିଙ୍ଗ୍ ନିନ୍ନୁ ନିଜେଦି ମାରିନ୍ ଆଇ, ନିନ୍ନୁ ଉପ୍‌କା ମାରିନ୍ ।

୯ ମା ଦୁନିଆଦି ବୁବାର୍ ମାଙ୍ଗ୍ ସାସ୍ତି ସିତିଙ୍ଗ୍ ବା ମାଡୁ ମେନ୍‌ଲୁତି
 ବୁବାରିଙ୍ଗ୍ ମାନାନିକା । ଆରଡିଙ୍ଗ୍ ମା ମୁସକୁପୁରଡି ବୁବାଦି
 ସାସନ୍‌ତି ଆଡ଼ଗି ଆଜି ତେବାନିକା ଏସ ନାଣ୍ଟ ନେଗିମାଟା !

୧୦ ମା ଦୁନିଆଦି ବୁବାରି ଆଗଡ଼ି ଏମେକା ତାଗ୍‌ଇକା, ଆୟା
 ଇସାବ୍‌ତାନ୍ ମାଙ୍ଗ୍ ଉଣା ଦିନ୍ ଉଣ୍ଡିଙ୍ଗ୍ ସାସନ୍ କିନାର୍; ମାତର୍ ମାଡୁ
 ଏଣ୍ଡେସ୍ ଝାନି ପବିତ୍ରତାଦୁ ମିସାଦେଙ୍ଗ୍ ଆବ୍‌ନିକା, ଇୟାଉଣ୍ଡିଙ୍ଗ୍ ମାପୁରୁ
 ମା ନେଗି ଉଣ୍ଡିଙ୍ଗ୍ ମାଙ୍ଗ୍ ସାସନ୍ କିନାନ୍ ।

୧୧ ସାସ୍ତି ପୋଇନି ଖାଲେ ମାଙ୍ଗ ଆକା ଦୁଃଖଅଭିନିକା ମାନାଡ଼, ମୁଡ଼ୁକେ ଖେଡ଼ିକାଦିକା ଆଏଡ଼ । ମାତର ସାସ୍ତିଦାନ ଏମେଖାରି ଜିବନ୍ ସାନ୍ତି ଆନାଡ଼, ଖାର ଖେନ୍‌କା ସାନ୍ତିଦି ଦାର୍ମୁଦି ଜିବନ୍ ଖାଜା ପୁରସ୍କାର ପୋଇନାର ।

ଉପଦେସ୍ ନି ଜାଗାରତାମାଟା

୧୨ ଆଦେଙ୍ଗ୍ ମି ସାକିସିଲି କିୟୁ ମୁସକୁ ପେରୁଦୁ ମାରି ତିରିଗ୍‌ନି ମେଣ୍ଡାଦିଙ୍ଗ୍ ସାକ୍ତି କିଦୁ ।

୧୩ ମାରି ନିଜେ ନିଜେଦି ପାଦାମ୍ବତି ଉଣ୍ଡିଙ୍ଗ୍ ସିଦା ସାରିଙ୍ଗ୍ ବୁଲାଦୁ; ଆରତିଙ୍ଗ୍ ମି ସଟା କାଲୁ ସଟାଆଏଜି ନେଗେନ୍ ତେବାନାଡ଼ ।

୧୪ ଓଜେରି ଖାଲେ ସାନ୍ତିଦାନ ବାସାକିଦେଙ୍ଗ୍ ମାରି ପବିତ୍ରଦାନ ଜିଦେଙ୍ଗ୍ ସେସ୍ଟା କିଦୁ; ଇରିଙ୍ଗ୍ ତାନି ବାଦୁଲୁ ଏନ୍ ପ୍ରବୁଦି ଦର୍ସନ ପୋଇଦେଙ୍ଗ୍ ଆଟ୍‌ଏନ୍ ।

୧୫ ଜାଗାରତା, ଏଣ୍ଡେସ୍ ମାପୁରୁଦି ଦୟାଦାନ ତେବାମାଟ୍ । କେୟନି ମାରାନ ଖାଜା ଆମାଟ୍ । କେୟନି ମାରାନ ପିରିତିଙ୍ଗ୍, ତାନି ଓସାମ୍‌ତି ମାଡ଼ାନ ନାଣ୍ଡ ନାସ୍ତ ଆନାଡ଼ ।

୧୬ ଏସୌ ଖାଜା ଏନ୍ ତାଗ୍‌ଇକାନ ମାରି ଅଦାର୍ମୁଦିକାନ ଆମାଟ୍; ଖାନ ତୋ ଉନ୍‌ଡେ ଅତିଦି କାଦି ଉଣ୍ଡିଙ୍ଗ୍ ପେରିଅଦିକାର ପୋରତା ମାର୍ହାନ ।

୧୭ ମିର୍ ନେସ୍‌ତିମାନିଦେର୍ ଜେ, ଖାନ ବୁବାଦି ଆସିବାଦ୍‌ତି ଅଦିକାରି ଆନି ଉଣ୍ଡିଙ୍ଗ୍ ବଦା କିତାନ, ମାତର ଡିସାୟ ଆତାଡ଼ । ମାରି ଏଡ଼କିନି ନାଣ୍ଡ କାଣେରଙ୍ଗ୍ ଖାକ୍‌ସି ଜାତୁନ୍‌ତାନ ସେସ୍ଟା କିତିଙ୍ଗ୍‌ବା ଆକା କିନି ଉଣ୍ଡିଙ୍ଗ୍ ମାରି ସୁଜୋଗ୍ ପୋଇଏତାନ୍ ।

୧୮ ଇସ୍ରାଏଲ୍‌ତିଲୋକୁ ଖାଜା ମିର୍ ସିନାଇ ଗରନ୍‌ଡୁ କାସ୍‌ସିମାନି ସିସୁ, ସିର୍ ସିକାଟି, ନାଣ୍ଡଗାଲିପିରୁ,

୧୯ ବାଜାମରିଦି ଆଉଲି ମାରି ବାକ୍ୟଦି ବଲୁ ଲାକ୍‌ଡୁ ରେଇଦେର୍, ଲୋକୁ ଆୟା ବଲୁ ଖେନ୍‌ଜି ଏଣ୍ଡେସ୍ ଖାରିଙ୍ଗ୍ ମାରି ଆମାଇନି ବାକ୍ୟ ଖେର୍‌ଏର୍, ଇକା ଅନୁରଦ୍ କିତାମାର୍ହାର୍,

୨୦ ଇରିଙ୍ଗ୍ ଆମାଇନି “ଜାତୁ ବା ଜଦି ଆୟା ଗରନ୍‌ତିଙ୍ଗ୍ ମୁଟ୍‌ତିଙ୍ଗ୍, ଆରତିଙ୍ଗ୍ ତାନିଙ୍ଗ୍ କାଲ୍‌କାଣ୍‌କୁ ସାୟାମାର୍‌ଗା ତାକ୍‌ନାର୍,” ଇୟା

ଆମା ମାଟା ସିଆୟାଆତା ମାର୍ହାତ୍ ଆକା ଖାର ସାସ୍ କିଦେଙ୍ଗ୍ ଆଟ୍‌ଏତାର ।

୨୧ ମାରି ଆୟା ସୁଡ଼ୁକା ଇୟାଖାଜା ତିଲାନିକା ମାରାତ୍ ଜେ, ମୋସା ଇର୍ହାମାରାନ୍, “ନାନୁ ତିଲାତା ମାରି ତିରଗିଜିନା ।”

୨୨ ମାତର୍ ମିର୍ ଖାତିମାନିଦେର୍ ସିୟୋନ ଗରନ୍‌ତୁ ମାରି ଜିବନ୍‌ତି ମାପୁରୁଦି ଗାଡ଼, ମୁସକୁପୁରତି ଜିରୁସାଲମ୍‌ତୁ, ଏମେମାନୁ ହଜାର୍ ହଜାର୍ ମୁସକୁପୁରତି ଦୁଡ଼କା ଦୋଲ୍ ।

୨୩ ମାପୁରୁଦି ଏମେ ଆଗ୍‌ତି ଜନମ୍‌ଆତି କଡ଼ରଆଇଲିକା ଦରୁ ମୁସକୁପୁରତୁ ରାସାତା ମାନାତ୍, ମିର୍ ଖାରି ଖେଡ଼ିକାଦୁ ଖାତିମାନିଦେର୍ । ଝିଜୁ ଲୋକା ଜାତିଦି ବିଚାରକିନି ମାପୁରୁଦି ଲାକ୍‌ତୁ ମାରି ପୁରା ଦାମୁଦି ଲୋକାଦି ଆମେଙ୍ଗ୍‌ ଲାକ୍‌ତୁ ମିର୍ ଖାତିମାନିଦେର୍ ।

୨୪ ମାରି, ପୁନି ନିୟମ୍‌ ତିଆର୍ ଆତିମାନି ଜିସୁଦି ଲାକ୍‌ତୁ ମାରି ଏମେଖାନି ନେତେର୍ ହେବଲ୍‌ଦି ନେତେର୍ ବାଦଲ୍‌ ନେଗି ବାକ୍ୟ ସିନାନ୍ ଇଜି ଆସା କିଜିନା, ଆୟା ନେତେର୍ ଲାକ୍‌ତୁ ଖାତିମାନିଦେର୍ ।

୨୫ ଆୟାଉଣ୍ଡିଙ୍ଗ୍ ଜାଗାର୍‌ତା, ଏନ୍ ବାକ୍ୟ ଖେରସିନାନ୍, ଖାନିଙ୍ଗ୍ ଡିସ୍‌ମାଟ୍ । ମୁସକୁପୁରତାନ୍ ବାକ୍ୟ ଆସ୍‌ସି ଖାଜି ଦୁନିଆଦୁ ତାନିଙ୍ଗ୍ ଖେରତିମାନି ଲୋକ୍‌ତି ଉଣ୍ଡିଙ୍ଗ୍ ଏମେକାର ଖେନ୍‌ଏତାର, ଖାର୍ ଏର୍‌ବା ରକିୟା ପୋୟ୍‌ଏତାର । ଆରତିଙ୍ଗ୍, ଇଲେଇ ଏନ୍ ମୁସକୁପୁରତୁ ମାନ୍‌ଜି ଖାରଗିଜିନାନ୍, ଖାନିଙ୍ଗ୍ ଡିସ୍‌ତିଙ୍ଗ୍ ମାଡୁ ଇନିକା ରକିୟା ପୋଇଦେଙ୍ଗ୍ ଆଟ୍‌ନିକା ?

୨୬ ନାସ୍ତିଖାଲେ ଖାନି ବଲ୍‌ ପୁତିବିଦିଙ୍ଗ୍ ଦୁକ୍‌ତା ମାର୍ହାତ୍ । ମାତର୍ ଇଲେଇ ଖାନ୍ ପାର୍‌ମାଣ୍ କିଜି ଇର୍ହାମାନାନ୍, “ନାନୁ ମାରିଡେସି କେବଲ୍‌ ପୁତିବିଦିଙ୍ଗ୍ ସିଲେ, ବାଦଡ଼ତିଙ୍ଗ୍ ବା ଦୁକ୍‌ନା ପୋକ୍‌ନା ।”

୨୭ ଇବେଟ୍‌ତାନ୍ ଟିକ୍‌ ଜେ, ଖାନ୍ “ମାରିଡେସି” ଆମାକା କିନାନ୍, ତାନିମାଡାନ୍ ତିଆର୍‌ଆତି ଝିଜୁ ବିସୟ୍‌ ଦୁଙ୍ଗୁଜି ମାରଗାନାତ୍ । କେବଲ୍‌ ଏମେ ଝିଜୁ ବିସୟ୍‌ ଦୁଙ୍ଗୁଦେଙ୍ଗ୍ ଆଟ୍‌ଉ, ଆକା ଡାଟ୍‌ ଆଜି ତେବାନାତ୍ ।

୨୮ ଆଦେଙ୍ଗ୍ ରାଦୁ, ମାଡ଼ ଦନ୍‌ସବାଦ୍ ସିନାଟ୍, ଇରିଙ୍ଗ୍ ମାଡ଼ ଉନ୍‌ଡ୍ରୁ ଆଟ୍‌ଖା ରାଜି ପୋୟ୍‌ନାଟ୍ । ରାଦୁ, ମା ଦନ୍‌ସବାଦ୍ ସିଜି ମାରି ବକ୍ତି ନି ତିଏଲ୍‌ତି ଖାଲେ ମାପୁରୁଦି ଖେଡ଼ିକା ଆଜି ଖାନିଙ୍ଗ୍ ପୁଜା କିନାଟ୍ ।

୨୯ ଇରିଙ୍ଗ ସତ୍ତାନ୍ ମା ମାପୁରୁ ଅରେନ୍ ଦଂସକିନି ସିସୁ ଖାଜା ।

୧୩

ଏଣ୍ଡେସ ମାପୁରୁଙ୍ଗୁ ଖେଡ଼ିକା କିନିକା

୧ କ୍ରିସ୍ତ ବିସ୍ବାସି ତୋଡ଼ାନ୍କୁ ନି ତାଙ୍ଗୁଁକ୍ ନିଜେନିଜେଦିଙ୍ଗୁ ଜିବନ୍ନୋଜି ମାଣ୍ଡୁ ।

୨ ଖାଜିମାନି ଲୋକାଙ୍ଗୁ ମି ଇଲୁତୁ କୁକ୍ତୁ । ଇକା କିନି ମାଡ଼ାନ୍ ଏନ୍ ଏନ୍ ନେସଏଣ୍ଟା ମୁସକୁପୁରତି ଦୁଡ଼କାଙ୍ଗୁ ସେବାକିତାମାନାର ।

୩ ଜଇଲ୍‌ଡୁମାନି ଲୋକା ଖାଲେ ନିନ୍ ନିଜେ ଜଇଲ୍‌ଡୁ ତେବାଜି ଦଣ୍ଡ ପୋଇଜିନି ଖାଜା ଅଡ଼ବିଜି ଖାରିଙ୍ଗୁ ଏଡ଼କିଦୁ । ଦୁଃଖକାସୁ ବର କିଜିମାନି ଲୋକା ଖାଲେ ଖିଜୁ ଦୁଃଖ ସିନ୍ତା କିଜି ଖାରିଙ୍ଗୁ ଏଡ଼ କିଦୁ ।

୪ ପେଡ଼ି ଖିଜେରି ଉଣ୍ଡିଙ୍ଗୁ ନେଗିକା ଆପିଡ଼, ମେମାରି ନି ଆଇମା ନିଜେନିଜେଦି ଉଣ୍ଡିଙ୍ଗୁ ବିସ୍ବାସତାନ୍ ତେବାପିର । ମାପୁରୁ ଲାଲାୟୁଆନି ଖାରିଙ୍ଗୁ ମାରି ଦାରିପାଣିକିନିଖାରିଙ୍ଗୁ ବିଚାର କିନାନ୍ ।

୫ ଦନ୍‌ସମ୍ପତି ଆସାଦାନ୍ ଆକତେବାଦୁ ମାରି ମି ଏମେକା ମାନାଡ଼, ଆବେନ୍ ଖେଡ଼ିକାଦାନ୍ ତେବାଦୁ । ଇରିଙ୍ଗ ମାପୁରୁ ଇର୍ହାମାନାନ୍, “ନାନ୍ ମିଙ୍ଗୁଁ ଡ଼ିସ୍‌ଏ, ନାନ୍ ନିଙ୍ଗୁଁ ଏସାଙ୍ଗୁ ପେରୁଏ ।”

୬ ମାରି ମାଡୁ ସାହାସତାନ୍ ଇନ୍‌ଡ୍ରେଙ୍ଗୁ ଆଟ୍‌ନିକା,
“ପ୍ରବୁ ନା ସାକାକିନିକାନ୍ ।

ନାନ୍ ଡିଲାଏ,

ଏନ୍ ନା ଅନିସ୍ତୁ କିଦେଙ୍ଗୁ ଆଟ୍‌ନାନ୍ ?”

୭ ଏମେ ନେଡାର ପୁର୍ବେ ମିଙ୍ଗୁଁ ମାପୁରୁଦି ବାକ୍ୟ ଖେରତା ମାର୍ହାଡ଼, ଖାରିଙ୍ଗୁ ଏଡ଼କିଦୁ । ଖାରି ଜିବନ୍ ବା ସାନିକା ଏଣ୍ଡେସନାକିକା ମାର୍ହାଡ଼, ଆକା ଏଡ଼କିଜି ଖାରି ବିସ୍ବାସତିଙ୍ଗୁ ନିଜେଦି ଜିବନ୍‌ଡୁ ଆସଡୁ ।

୮ ଜିସୁ କ୍ରିସ୍ତ ଇଏନ୍, ନେରୁ ମାରି ଖିଜୁଦିନ୍ ସାମାନ୍ ମାନାନ୍ ।

୯ ଆଇ ଆଇ ବୁଲ୍ ଦାମ୍ ସିକ୍‌ୟା ମିଙ୍ଗୁଁ ସଡ଼ ସାରିଦାନ୍ ଖେରୁଏ କିମାକିଡ଼ । ମାପୁରୁଦି ଦୟାଦାନ୍ ଜିବନ୍‌ଡି ଉଣ୍ଡିଙ୍ଗୁ ସାକ୍ତି ଉଣ୍ଡାକିନିକା ନେଗିକା, କାଦି ଉଣି ବିସୟତାନ୍ ନିୟମ୍ ମାନାନି ମାଡ଼ାନ୍ ଇକା ଆଦେଙ୍ଗୁ ଆଟ୍‌ଏଡ଼ । ଆଡ଼ରେରି ବିଦି ଖିଜୁ ମାନାଜିମାନି ଲୋକୁ ଆବେଣାନ୍ ଇନି ଉପକାର ପୋୟୁଏର ।

୧୦ ମା ଏମେ ଜଞ୍ଜ ବେଦି ମାନାଡ଼, ଆବେନ୍ନୁ ମାନି ପୁଜାସିତିମାନି କାଦି ଉଣ୍ଡେଙ୍ଗ ଜିହୁଦି ଜାଜକରି ଅଦିକାର୍ ସିଲେଡ଼ ।

୧୧ ଜିହୁଦି ପେରିଜାଜକ ବଲି ସିତିମାନି ଜାତୁଦି ନେତେର ପାପ୍ତି ବାଦ୍ଲୁ ଖାଜା ପୁଜାସିଦେଙ୍ଗ ମହାପବିତ୍ର ବାଡ଼ିଦୁ ଆସ୍‌ସି ସନାର୍; ମାତର୍ ଆୟା ଜାତୁଦି ମେନ୍‌ଲ ନାର୍‌ତି ଆତେରେ ଆଡ଼ାକ୍‌ନା ପୋକନାର୍ ।

୧୨ ଆୟାଖାଜା ଜିସୁ ବା ନିଜେଦି ନେତେରତାନ୍ ଏଣ୍ଡେସ୍ ଲୋକାଙ୍ଗ ପାପ୍‌ଦାନ୍ ପବିତ୍ର କିନି ଉଣ୍ଡିଙ୍ଗ ଗାଡ଼ି ଆତେରେ ସାତାନ୍ ।

୧୩ ଆଦେଙ୍ଗ୍ ସାଦୁ, ମାତୁ ବା ଗାଡ଼ି ଆଡ଼ରେ ଖାନି ଲାକୁଡୁ ସନାର୍ ମାରି ଖାନି ଖାଲେ ନିନ୍‌ସା, ଅପମାନ୍ ସାସ୍ କିନାର୍ ।

୧୪ ଇରିଙ୍ଗ୍ ମା ଉଣ୍ଡିଙ୍ଗ୍ ଇୟା ଜଗଡ଼ଦୁ ଆମାଈନି ଝିଜୁଦିନ୍‌ତି ତେବାନି ଗାଡ଼ି ସିଲେଡ଼, ଏମେ ଗାଡ଼ି ବବିସଡ଼ଦୁ ତିଆର୍ ଆନାଡ଼, ମାପ୍ ଆୟା ଗାଡ଼ିଙ୍ଗ୍ କାପ୍‌କିଜିନାପ୍ ।

୧୫ ମାରି ରାଦୁ, ମାପ୍ ଜିସୁଦି ମାଣାନ୍ ମାପୁରୁଙ୍ଗ୍ ମା ପ୍ରସଂସା ନାନି ବଲି ସିନାର୍ । ଇୟା ବଲି ଜିସୁଙ୍ଗ୍ “ପ୍ରବୁ” ଇଜି ମାନାଜିମାନି ଝେୟୁଦାନ୍ ପୁଜା କିନାର୍ ।

୧୬ ଆଇଖାରି ନେଗିପାଣି କିଦେଙ୍ଗ୍ ମାରି ଖାରିଙ୍ଗ୍ ସାହାଜ୍ୟ କିଦେଙ୍ଗ୍ ବାଣାମାଟ୍, ଇରିଙ୍ଗ୍ ଇୟାଝିଜୁ ନେ ମାପୁରୁଦି ଝେଡ଼ିକାଦି ବଲି ଖାଜା ।

୧୭ ମି ନେତାରି ଆଡ଼ଗି ଆଦୁ, ଖାରି ଆଦେସ୍ ଆସଡୁ । ଖାର୍ କାପ୍‌କିନିଲୋକ୍ ଖାଜା ମି ଆମ୍ବାଦି ରକ୍ଷା ଉଣ୍ଡିଙ୍ଗ୍ ରମ୍‌ଏଶଗା କାପ୍‌କିତାମାନାର୍, ଇରିଙ୍ଗ୍ ଖାରିଙ୍ଗ୍ ମାପୁରୁଦି ଲାକୁଡୁ ନିଜେଦି ପାଣିଦି ଇସାପ୍ ସିଦେଙ୍ଗ୍ ପଡ଼ାନାଡ଼ । ମିର୍ ଜଦି ଖାରି ଆଡ଼ଗି ଆନିଦେର୍, ଆର୍‌ତିଙ୍ଗ୍ ଖାରୁ ଝେଡ଼ିକାଦି ମୋନତାନ୍ ନିଜେଦି ପାଣି କିନାର୍, ମାତର୍ ଜଦି ଆକା କିଇଦେର୍, ଆର୍‌ତିଙ୍ଗ୍ ଖାର୍ ଦୁଃକ୍ ମୋନତାନ୍ ଆକା କିନାର୍ ମାରି ଇକା ମି ଉଣ୍ଡିଙ୍ଗ୍ ନେଗିକା ଆଏଡ଼ ।

୧୮ ମା ଉଣ୍ଡିଙ୍ଗ୍ ପାର୍‌ତନା କିଦୁ । ମା ବୁଦି ଜେ ନେଗିକା, ଇବେନ୍ନୁ ନାମ୍‌ଇକା ସିଲେଡ଼, ଇରିଙ୍ଗ୍ ଝିଜୁଦିନ୍ ନେଗେନ୍ ଜିଦେଙ୍ଗ୍ ମା ଉଣ୍ଡେ_ବଦା ।

୧୯ ମାରି, ମାପୁରୁ ନାଙ୍ଗ୍ ମି ଲାକୁଡୁ ବେଗି ପୋକିନ୍, ମିର୍ ନା ଉଣ୍ଡିଙ୍ଗ୍ ଇୟା ପାର୍‌ତନା କିଜିମାଣ୍ଡୁ ଇକା ମି ଲାକୁଡୁ ନା ଜିବନ୍‌ତାନ୍ ଅନୁରୋଦ୍ କିଜିନା ।

ସାରାସାରି ପାରତନା

^{୨୦} ଏନ୍ ନିଜେଦି ବଲିଦାନ୍ ମେଣ୍ଡେଆଙ୍ଗା “ପେରି ମେଣ୍ଡେଙ୍ଗ୍‌ସାରାକିନିକାନ୍” ଆତାମାନାନ୍, ମା ଆୟା ପ୍ରବୁ ଜିସୁଙ୍ଗ୍ ମାପୁରୁ ସାତିମାଣାନ୍ ମାରିଡେସି ନିକ୍ତାମାନାନ୍ । ଆୟା ଜିସୁଦି ସାତି ବଲିଦି ନେତେରତାନ୍ ଉଣ୍ଡି ଝିଜୁଦିନିତି ନିୟମ୍ ଆତାମାନାଡ଼ । ସାନ୍ତିସିନି ମାପୁରୁ ଝାନି ବଦା ମାନାନି ଉଣ୍ଡିଙ୍ ମି ଦରକାରତି ଇସାବତାନ୍ ଝିଜୁ ନେଗି ବିସୟ୍ ସିପିନ୍ ।

^{୨୧} ମାରି ଜିସୁ କ୍ରସ୍ତଦି ମାଣାନ୍ ମା ଜିବନ୍‌ତୁ ଝାନି ଝେଡ଼ିକାଦି ନେଗି ପାଣି ପୁରା କିପିନ୍ । ଜୁଗ୍ ଜୁଗ୍ ଗୌରବ୍ ଝାନିନ୍ଦି ଆପିଡ଼ । ଆମେନ୍ ।

ସାରାସାରି ମାଟା

^{୨୨} ଏ ତଡ଼ାନ୍‌କୁ ନି ତାଙ୍ଗ୍‌କ୍, ଅନୁରୋଦ୍ କିଜିନା, ନା ଇୟା ଆକୁଦି ବାକ୍ୟ ଉଣ୍ଡିଙ୍ ସାସ୍ତି ଖାଲେ ମୋନଦିୟାନ୍ ସିଦୁ । ମିଙ୍ଗ୍ ଝେଡ଼ିକା କିନି ଉଣ୍ଡିଙ୍ ଇକା ନାନୁ ରାସ୍ତାମାନା ।

^{୨୩} ମା ତଡ଼ାନ୍ ତିମତି ଜଇଲ୍‌ତାନ୍ ମୁକ୍ତାତାମାନାନ୍ ଇଜି ନେସ୍‌ନିଦେର୍ । ଝାନ୍ ଜଦି ବେଗି ଝାନାନ୍, ଆରଡିଙ୍ ନାନୁ ଝାନିଙ୍ ଅରସେ ଆସ୍‌ସି ମି ଲାକ୍‌ତୁ ଝାନା ।

^{୨୪} ମି ଝିଜେରି ପେରିଝାରିଙ୍ ମାରି କ୍ରସ୍ତ ବିସ୍‌ବାସିରିଙ୍ ମା ନମସ୍କାର୍ ଜାଣେ କିଦୁ । ଇଟାଲି ଦେସ୍‌ତାନ୍ ଝାତିମାନି ତଡ଼ାନ୍‌କୁ ମିଙ୍ଗ୍ ନମସ୍କାର୍ କିଜିନାର ।

^{୨୫} ମି ଝିଜେରି ଲାକ୍‌ତୁ ମାପୁରୁଦି ଦୟା ଝିଜୁଦିନ୍ ମାନିଡ଼ ।

ମାପୁରୁଦି ସବ୍ ବାକ୍ୟ

The New Testament in the Konda Porja Lanugage of India. Konda-Dora: ମାପୁରୁଦି ସବ୍ ବାକ୍ୟ (Bible)

copyright © 2020 The Word for the World International and Konda Porja
Translation Samithi, Dasamanthpur, Odisha

Language: Konda Porja (Konda-Dora)

Contributor: The Word for the World South Asia

ମାପୁରୁଦି ସବ୍ ବାକ୍ୟ

ପୁନି ନିୟମ, 2020

The New Testament in Konda Porja Language

The Word for the World International

This translation is made available to you under the terms of the Creative
Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did so in
a way that makes it clear that the original licensor is not necessarily
endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

Note that in addition to the rules above, revising and adapting God's Word
involves a great responsibility to be true to God's Word. See Revelation
22:18-19.

2025-05-07

PDF generated using Haiola and XeLaTeX on 6 May 2025 from source files
dated 7 May 2025

506ae627-08e2-556a-b39e-5315f886d95a